

8  
*In Antiquis est Sapientia.*

Job. 12. V. 12.

# UNITAS

## DOGMATICA & POLITICA

*In qua agitur de Reformatione, hoc  
tempore attentata in Belgio:*

O B L A T A

SERENISSIMO PRINCIPI

JOANNI AUSTRIACO

ANTIQUITATIS PATRONO,

FIDEI PROPUGNATORI.



ANNO CHRISTI 1679.

*Cum Approbatione.*



THE UNIVERSITY OF CHICAGO  
JAN 10 1892

UNITAS

DOCTRINAE & POLITICAE

THE UNIVERSITY OF CHICAGO  
JAN 10 1892

UNITAS

DOCTRINAE & POLITICAE

UNITAS

DOCTRINAE & POLITICAE

UNITAS

UNITAS

UNITAS

## LECTORI CATHOLICO

E T

BENEVOLO TYPOGRAPHUS.

**V** Erè & benè dixit Propheta Iob cap. 12.  
 v. 12. In antiquis est Sapientia :  
 ut autem homines hac potiri vale-  
 rent , admonet Ieremias c. 6. v. 16. dicens :  
 State super vias , & videte , & interro-  
 gate de semitis antiquis , quæ sit via bo-  
 na , & ambulate in ea , & invenietis re-  
 quietem animabus vestris. Ut veram Sapien-  
 tiam consequamur omnes , Author hoc scriptum  
 SERENISSIMO PRINCIPI obtulit  
 ( quod ad manus meas pervenit ab Anonymo ,  
 quodq; publici juris facio ad solatium verorum  
 Catholicorum ) Eiq; tam Dogmaticam quam  
 Politicam Unitatem intimavit , & benè :  
 nam in Unione & Sapientia est salus posita ;  
 è contrà verò , in sectione , distinctione , & di-  
 visione perniciēs & stultitia ; idèò quoad ejus  
 esse possunt efficere universa omnia , sive natura-  
 lia , sive quæ arte constant , conjungunt sese ac  
 condurant , atq; in Unione ad sui tutelam per-  
 sistunt. Lapis ut esset lapis , omnes ejus partes ,  
 omnisq; natura in unum solidata est. Quid ?



Arbor , arbor quidem non esset , si una non esset. Quid ? membra cujuslibet Animantis , ac viscera , & quidquid est eorum quibus constat , certe si unitatis patiantur divortium , non erit animal : populus una Civitas est , cui periculosa dissensio : Quid est autem dissentire , nisi non unum sentire ? Ex multis militibus fit unus Exercitus ; itemq<sup>ue</sup> multitudo eò minus vincitur , quo magis in unum còit. Videmus ab unione generari virtutem ; quia quanto unio strictior est , tanto fortior est virtus ; & quo essentia magis est unita , eo majoris censetur esse virtutis.

Hinc , ad humanum Principatum descendendo ; concluditur ( ut inquit Petrus Bongus ) Analogiam quandam esse terreni Principis , sicut & divini , cujus gerit simulachrum : Quò quidem modò dico ; in unâ navi non possunt esse Gubernatores multi ; nec in unò Regimine multi Reges ; sed unus Rector in mundanâ fabricâ ; moderator unus in bellò ; unus est summus Imperator ; & in quovis grandi exercitu unius signum expectatur : Rex unus est Apibus , & unus in gregibus , & in armentis ductor unus : Grues unum sequuntur ordine iteratò , formam trianguli efficientes : in Navi unus est Gubernator ; in Civitate unus Imperator ; in Corpore unum Caput ; in Regno unus Rex ; in Ecclesiâ unus Summus Pontifex , cujus infallibili doctrinâ om-



nes nos submittere oportet ; & tunc verè flore-  
 bit unitas Dogmatica & Polytica. Quod ut  
 fiat , & unusquisq; non fabricet & proponat  
 novitates secundum spiritum suum , hæc scripta  
 sunt : Hinc enim omnis error , scandalum omne,  
 & schisma timendum : Cumq; aliqui Ecclesiasti-  
 cas Censuras & pœnas non multum videantur ab-  
 horrere ; hinc gladio spirituali temporalis jun-  
 gendus est : Et Principes habent ( præter  
 mille alios ) quem imitentur PHILIPPUM III.  
 pia memoria Regem potentissimum , qui subditis  
 suis hereticis pacisci noluit , & nullius aliam  
 magis curam habuit , quam hostes Ecclesiæ pro-  
 fligare : Et profecto habent Hispaniarum Re-  
 ges ( ut dicit Joseph Stephanus in quadam sua  
 Oratione ) & cum Eis universa Provincia præ-  
 ter militarem virtutem & laudem , qua maxi-  
 mè nobilitantur , insitam ac quasi innatam fidei  
 pietatem , per quam omnia suscepta consilia ad  
 Sanctam referunt Sedem ; ut in cā , tamquam in  
 firmissimis totius Regni viribus , ac munimentis  
 insistant : quod & confirmat sancta Inquisitionis  
 officium institutum , sub quò non patitur Hispa-  
 nia illos fluctus & turbines , quibus multa Pro-  
 vincia magna & miserrima fortunarum & fidei  
 naufragia pertulerunt : Sed cum eo deficiente in  
 Belgio novitates incipiant , necesse est ut modo  
 opportuno illæ impediuntur , ne fiant in laqueum  
 & miseris in ruinam. Sed forsitan quispiam co-

gitabit , nondum video schisma aliquod : Resp.  
 latet serpens sub herbâ , & quæ jam parvi aliqui  
 faciunt , verè , si finem , Originem , & Scopum  
 considerarent , magni æstimarent : nam parva  
 scintilla magnum causat incendium : hoc pru-  
 dentissimè consideravit nuper Regina nostra tunc  
 Regens , Mater Monarchæ nostri , dum , cum  
 dolore intelligens novitates hic accrescere , man-  
 davit Comiti de Monterey , tunc Belgii Gu-  
 bernatori , &c. ut impediret , ne quis novitates  
 aliquas introduceret , nisi sancta Sedes consulta  
 aliqua publicanda & observanda determinaverit :  
 Sic patet ex propriis Regina litteris datis & sigil-  
 latis de more Madriti 30. Iunii anno 1675.  
 Cujus & zelum considerans Author hac scripsit  
 non acri sed simplici stylo & animo ; non verbis  
 politis , sed veris & sinceris : Quicumq; legis  
 aequi boniq; consule , & cum Authore Unitatem  
 ama & defende : Vale.

# UNITAS

## DOGMATICA ET POLITICA.

*Vnus Dominus, una Fides, unum Baptisma,*

*Ad Ephes. cap. 4. v. 5.*

*Solliciti servare unitatem Spiritus in vinculo  
pacis. Ephes. cap. 4. v. 3.*

**U**Nitatis utilitatem & necessitatem nobis proponit D. Augustinus in Serm. 26. de verbis Domini, dicens : *Da enim unum ; & populus est ; tolle unum , & turba est : Nam omnia sic ad unitatem tendunt , ut sint multa partibus , unum toto , & quæ sunt multa accidentibus , sint unum subjecto , quæque multa numero unum specie , & quæ speciebus multa , unum genere & unum principio sint , quæ multa processibus : adeò ut creata omnia , quantumvis divisa & disparata , unum sint , & ad Unitatem anhelent : Ex quâ , ut ait Aristoteles , oritur concinna quadam , & quasi modulata partium mundi consensio , quæ harmoniam unam efficit omnium pulcherrimam : quam & verè esse dixit Tutricem & Conservatricem universi : Sed si hujus tutrix & conservatrix est Vnitas & concordia , eadem & hominis esse debet sive microcosmi , vel hominum inter se , qui membra sunt unius corporis , teste Apostolo 1. Cor. cap. 10. v. 17.*



*Vnum corpus multi sumus.* Si ergò *Vnitas* fuerit essentialis creationi universi , quanto magis necessaria ejusdem gubernationi *Vnitas dogmatica* sive doctrinalis , quæ facit gentes & populos , patria & moribus diversos , occurrere in unitatem fidei ; nec tantum , sed & ad unionem Polyticam hæc *Vnitas* doctrinalis adjuvat : hanc quoque , ut Regiminis finem , Rector attendere debet , ne socialis vitæ pereat utilitas : hac *Vnitate* Ecclesiastica & Politica floret Respublica , divisione perit : hanc probat utilem , imò necessariam demonstrat Regimen Ecclesiæ Monarchicum : Si enim Monarchiæ proprietates , simul & unitatis necessitatem perspicies. Confirmat intentum jus naturale & positivum.

Undè Novatoribus proponit sacer Textus , Deut. cap. 4. & 14. *Non addetis ad verbum quod ego præcipio vobis , nec auferetis ab Eò ;* id est , non aliam doctrinam docebitis præter illam in lege contentam : Ipseque Dei Filius , homo factus , novam laturus legem , ab antiqua sese non discrepare significavit , dicens Matth. cap. 5. *Non veni solvere , sed adimplere :* hinc optimè Clemens Alexandrinus lib. 11. Strom. *Novum* , inquit , *Testamentum veteri littera impressum erat.* *Vnitatem* Ecclesiæ veræ doctrinæque sanæ probat Scriptura , dum illam vocat *unum Corpus* Rom. 12. *unam Columbam* Cant. 6. *unum Ovile* Joan. 10. Idcirco , inquit Cyprianus 1. Epist. ad Magnum : *Dominus insinuans nobis unitatem , de Divina Authoritate veritatem ponit & dicit : Ego & Pater unum sumus : ad quam unitatem redigens*  
Eccles.

*Ecclesiam suam , denuò dicit ; & erunt unus grex & unus Pastor , scilicet sicut unus Christus , sic unus populus Christianus . Abelis Sacrificium Deo placuit , Cains displicuit Gen. 4. v. 4. Et 1. discriminis rationem assignasse videtur ipse Deus , Cainum statim allocutus , juxta septuaginta : Nonne , inquit , si rectè offeras , non autem rectè divides , peccasti ? Sed in quò male divisit ? Rupertus ad eum locum : Cain , inquit , non rectè divisit ; quia cùm Deo offerret sua , seipsum sibi retinuit : Cor suum retinuit sibi , & fructus terræ obtulit Deo . Videtis divisionem odiosam ? videte & unionem commendatam : Frater , qui adjuvatur à Fratre , quasi civitas firma . Proverb. 18. cap. v. 19. Ita optandum , ut unâ eademque doctrinâ Christiani Fratres invicem adjuvarent , ut sic eâdem viâ ad unum Deum venire possint : In unò , enim itinere , inquit Hugo Card. unitatis concordia insinuat , quam debent habere Doctores in docendo , & Predicatores in predicando . Habete in vobis sal , ait Dominus Discipulis Marci cap. 9. v. 50. & pacem habete inter vos , hoc est sal doctrinæ , ad condiendum Orbem ; pacem inter vos , ad conservandam charitatem : Nam , ut Beda ibi : Habere , inquit , sal sine pace , non virtutis est donum , sed damnationis argumentum .*

*Attendite ad hoc Novatores , & scitote quod non sit dissensionis Deus vester , sed pacis , ut Paulus 1. Cor. 14. quodque Matthæus cap. 12. dicat : Omne Regnum in se divisum desolabitur . Hæreses considera , divisiones numera , desolationes pondera , & lachrymas det oculus , cor fusa*



suspiria & gemitus in testes doloris , & quod inveniantur, quoad mores saltem, tot contentiones in scholis , tot contradictiones in cathedris, tot divisiones in doctrinis , ut inter Theologos modernos vaticinium illud Isaïæ cap. 19. adimpletum videatur : *Concurrere faciam Ægyptios adversus Ægyptios* : ita enim quidam inter se digladiantur , & , nescio quibus opinionum novitatibus, Christianam doctrinam misere dilacerant : hoc modo accidit ( ni fallor ) quod olim nascenti Ecclesiæ accidisse fertur , nempe *quod diaboli instinctu studia in Religione fierent* ( ut ait Hieronymus in cap. 1. ad Tit. ) & diceretur in populis ego sum Pauli , ego Apollo , ego verò Cepha.

De ratione essentiali Ecclesiæ est , ut sit una , unione membrorum inter se & cum capite suo : hanc autem unionem tollit , quisquis *Vnitatem doctrinalem* sive dogmaticam separat ac dividit : quod utique probat multiplex unitas , quæ in Ecclesia invenitur.

1. Est *Vnitas* ratione principii , id est Dei vocantis Joan. 6. *Nemo venit ad me nisi Pater traxerit eum.*

2. *Vnitas* ratione ejusdem ultimi finis , quem unum omnes qui in Ecclesia sumus intendimus , & qui in illo uno denario omnibus operantibus promisso præfiguratur Matthæi c. 20. *Vocati* (ait Apostolus Ephes. 4. ) *in una spe vocationis vestra.*

3. Est ratione omnium mediorum , id est fidei , Sacramentorum , legum ; juxta illud ad Ephes. 4. *Vna Fides , unum Baptisma.*

4. Ra



4. Ratione ejusdem Spiritus Sancti, à quo, tamquam externo & separato Rectore, universa Ecclesia gubernatur : *Divisiones gratiarum sunt* ( 1. Corinth. 12. ) *idem autem Spiritus.*

5. Est ratione ejusdem capitis tamquam interni & conjuncti Rectoris ; omnis enim Ecclesia uni Christo & ejus Vicario tamquam capiti paret.

6. Est ratione connexionis membrorum inter se & præcipuè cum capite, ut est principale membrum, *unum corpus sumus, alter alterius membra.* Rom. 12. quæ omnes unitates in una *Vnitate dogmatica* fundantur, & ab ea omnes, tamquam effectus à causa, dependent.

Primam *Vnitatem* scinderet, qui nos aliter, quam per gratiam Dei, in Filios Dei adoptari diceret.

Secundam Læderet, qui ultimum finem nostrum non in solo Deo sed etiam in creatis positum prædicaret, quod utique non faciunt illi, qui, præter Deum, creaturas diligi posse amore casto & moderato docent.

Tertiam *Vnitatem* omnino tollunt, qui dogmata fidei alio & alio modo, à communi doctrina alieno, doceri volunt, qui Sacramenta variis & insolitis dispositionibus administrari cupiunt, qui leges, humanæ fragilitati & miseriæ impossibiles, hominibus imponunt.

Quartam *Vnitatem* spernunt, qui gratia Spiritus Sancti, per manuum impositionem sibi data, *ad consummationem Sanctorum in ædificationem corporis sui*, quod est Ecclesia, sive tamquam Apostoli, sive tamquam Pastores & Doctores tam  
in

inordinate & præpostere abutuntur ad destructionem fidelium.

Quintam *Vnitatem* tollere nitantur, qui Ecclesiam bicipitem comminisci audent, non attendentes ad Bullam S. D. N. Innocentii X. adversus libros continentes propositionem, qua assertitur æqualitas SS. Petri & Pauli, est emanata Feria 5. die 24. Januarii 1647. ex illa hæc verba accipe : *Sanctissimus relata unanimi Theologorum, ad hoc specialiter deputatorum, censura, & auditis votis Eminentiss. & Reverendissimorum DD. Cardinalium Generalium Inquisitorum, propositionem hanc : S. Petrus & S. Paulus sunt duo Ecclesie Principes, qui unicum efficiunt. Vel : sunt duo Ecclesie Coriphei, ac supremi Duces summa inter se unitate conjuncti. Vel : sunt duo Ecclesie Summi Pastores, ac Prasides, qui unicum caput constituunt, ita explicatam, ut ponat omnimodam æqualitatem inter S. Petrum & S. Paulum sine subordinatione, & subjectione S. Pauli ad S. Petrum in potestate suprema & regimine universalis Ecclesie, hæreticam censuit, & declaravit.* Ex quibus patet unicum Ecclesie caput : & non vulgares Episcopos controversiarum fidei iudices, & membra capiti, id est Summo Pontifici, esse æqualia, multoque minus est unusquisque Parochus Pontifex in sua Parochia, &c.

Sextam aperte violant, qui caput Ecclesie de fallibilitate in decidendis rebus fidei absque Concilio generali infimulant, qui membra Ecclesie cum Capite suo (sive inter se) nescio quibus schismaticis contentionibus concurrere faciunt : credant potius cum Irenæo lib. 3. c. 3. *Eis, qui sunt undique fideles, necesse esse ad Romanam Ecclesiam*



fiam propter potentiorē ejus, five in profligandis erroribus, five in afferenda veritate principalitatem religioſe convenire. Ad quam Apoſtolicam Sedem, teſte Cypriano Epist. 55. *perſidia non poteſt habere acceſſum* : & cum Hieronymo ibidem : vos alio loquor ſi veri ſitis Catholici : *neſcitis Vitalem, Meletium reſpuitis, ignoratis Paulinum, perſuaſi Cunctos ſpargere, qui cum Romano Pontifice non colligunt* ; hoc eſt, qui Chriſti non ſunt, eſſe Antichriſti. Audite verba melliflui Bernardi Epist. 190. ad Innocentium Papam, atq; ex his infallibilitatem Innocentii XI: in decidendis quæſtionibus facti & juris agnoſcite : oportet ait ad veſtrum referri Apoſtolatum pericula quæque & ſcandala emergentia in Regno Dei ; ea præſertim qua de fide contingunt ; dignumq; arbitror ibi poſſimum reſarciri damna fidei, ubi non poſſit fides ſentire defectum : hac quippè hujus prerogativæ Sedis. Hæc Pontificis infallibilitas ex Scriptura, probatur tam ex 16. c. Matth. quam Joan. 21. Lucę 22. &c. de quo videte Theologos. At quæſo, quid nuper condemnavit Innocentius XI ? quid appoſuit ? audite verba, intelligite myſteria, condemnavit 65. Propositiones partim ex diverſis, vel libris, vel theſibus, ſeu ſcriptis excerptas, & partim noviter adinventas : ex quibus autem theſibus ? innotuit nuper, dum in Epistoſa Mechlinienſi nomina, anni, dies, quando & ubi deſenſæ innotuerunt ; ex originalibus enim ibidem convicti, qui contra expreſſum ſuę Sanctitatis mandatum eaſdem publice, etiam lingua vulgari, Religioſis Belgii adſcripſerunt in vanum & ex invidia : attendite quæſo & unitatem Spiritus conſervate : imprimate mentibus, ut



reprimatis linguas; SS. D. N. verba, quæ hæc sunt: *tandem, ut ab injuriosis contentionibus Doctores, seu scholastici, aut alii quicumque imposterum se abstinuant, & ut paci & charitati consulatur, idem sanctissimus in virtute S. Obedientia eis præcipit, ut tam in libris imprimendis ac manuscriptis quam in thesibus, disputationibus ac prædicationibus (notate verba) caveant ab omni censura, & nota, nec non à quibuscumque convitiis contra eas propositiones, quæ adhuc inter Catholicos; hinc inde controversantur, donec à S. Sede recognita super iisdem propositionibus iudicium proferatur. Ubinam obedientia vestra? dum non solum in Cathedris passionem ostendistis, sed & easdem propositiones monialibus, mulierculis, plebeculæ cum atrocibus in Religiosos verbis & schismaticis dictoriis tribuistis: non sic, non sic servatur *Vnitas*: imitemini Pontificis discretionem, quæ sevit in errores & dilexit errantes; quinam illi fuerint iudicent sani.*

Tantum saltem abest ut verum sit, nuperum quorundam assertum, quod Religiosi sint Auctores 65. damnatarum ab Innocentio XI. propositionum, quin potius illarum plurimas præcipuè impugnarunt, & prout jacent detestati sunt ante Anathema Romanum: unde, qui *Vnitatem* diligitis, scitote, quod multo minus verum sit pro iis tuendis contentiones excitatas in Belgio, ubi plærumque (utique ex Hispania, Sicilia, Germania, &c. accitæ) ne quidem auditæ sunt; *Vnitatem* lædis, quisquis ex censura laxitatum per Alexandrum VII. & Innocentium XI. consentaneum dicis, quod ab ipsis censuratae opiniones, etiam ante censuram,

non

non potuerint sine peccato practicari quocumque probabilitatis titulo : injurius es in Theologos Lovanienses , qui 1. 5. 6. 10. 11. 17. 18. 26. 27. 30. 36. 40. 42. 45. 54. 55. 65. aliisque patrocinati sunt sæpius ; non damnandas enim , sed damnatas docere pernicies summa est sanæ doctrinæ : Cogitate autem nihil gloriosius esse , teste August. in Psalm. 57. *quam subjici & vinci à veritate. Non enim vincimur* ( ait Cyprianus Epist. 71. ) *quando nobis meliora offeruntur , sed instruimur ; maxime in his quæ ad Ecclesiæ Unitatem pertinent , & Spei & Fidei nostræ veritatem* : Unde decet , ut unanimiter nos sanctæ Sedi submittamus , non solum admittentes condemnationem nuperam propositionum 65. scandalosarum & in praxi perniciosarum : sed & cum omni respectu recipientes constitutionem Pii Papæ V. datam Romæ anno 1567. Kalendis Octobris, Pontificatus anno secundo , adversus errores Michaëlis Baii , Doctoris Lovaniensis , in qua leges condemnationem 79. propositionum , quam confirmarunt postea Gregorius XIII. & Urbanus VIII. observemus & decretum ejusdem Urbani , quo prohibet librum , cui titulus , Augustinus Cornelii Jansenii , olim Iprensis Episcopi , &c. datum Romæ anno 1641. pridie nonas Martii, Pontificatus anno decimo nono. Amplectantur fideliter Constitutionem S. D. N. Innocentii Papæ X. qua damnantur ut hæreticæ quinque propositiones Cornelii Jansenii Iprensis Episcopi ; datam Romæ 1653. pridie kalend. Junii, Pontificatus anno 9. ejusdem Pontificis reveareantur decre-



cretum, quo Feria 5 die 23. Aprilis 1654. damnavit iterato Augustinum Cornelii Jansenii, simulque libros omnes ad ejusdem defensionem editos & edendos, ac denique abrogat quibusdam prætensis actis coram Clemente VIII. & Paulo V. simulque pseudo-bullæ Pauli V. contra doctrinam *Ludovici Molina*; observetur S. D. N. Alexandri VII. confirmatio, approbatio, innovatio & declaratio Innocentii X. de quinque propositionibus in materia fidei, Romæ 1656. decimo septimo kalendas Novembris, Pontificatus anno secundo; ejusdemque Pontificis constitutio, continens formulam subscribendi decretis Pontificiis adversus hæreses Cornelii Jansenii, quam invenio datam Romæ anno 1664. 15. kal. Martii, Pontificatus anno decimo.

Ut ergo *Vnitas dogmatica* floreat, captivemus omnes intellectum nostrum in obsequium fidei: hoc rectè intellexit Hieronymus Epist. 57. ad Damasum. *Beatitudini tuæ, id est Cathedra Petri, communionem confocior, super illam Petram ædificatam scio Ecclesiam, quicumque tecum non colligit, dispergit.* Attendite quæso ne *Vnitas dogmatica* à nobis lædatur, & fiat vobis sicut Babylonis, de quibus Scriptura Gen. 11. cum descendisset Dominus, & confudisset ibi linguam eorum, ut non audiret unusquisque vocem proximi sui, protinus cessaverunt ædificare civitatem, & idcirco (inquit Textus) vocatum est nomen ejus Babel, quia ibi confusum est labium universæ terræ: quamdiu nos sumus labii unius, tam diu proficiet ædificatio corporis illius mystici; sed cum confusum fuerit labium eorum, id est dum in-

fal



fallibili Summi Pontificis authoritati vos non submittat, sed variis & peregrinis doctrinis *Vnitas Dogmatica* divisa fuerit, illico cessabit ædificari Civitas Domini Dei nostri, & Cælestis illa Jerusalem brevi vertetur in Babel, ubi nullus ordo sed sempiternus horror inhabitat. *In compagen Christi* (inquit Augustinus) *tamquam in vivam structuram Templi Dei, quæ est Ecclesia nati homines, non ex operibus justitiæ, quæ fecerant, sed renascendo per gratiam transferuntur tamquam de massa ruina ad ædificii Firmamentum.* Firmamentum autem ædificii ex unione lapidum, id est Concordia fidelium, qui, juxta Apostolum, *tamquam cives Sanctorum & Domestici Dei superædificati, super fundamentum Apostolorum & Prophetarum ipsi summò angulari lapide Christo Iesu uniuntur* Glutino perfectæ charitatis: quam perfectam non habet intrepidus *Vnitatis dogmatica* perturbator, nec magis hic unus est cum Ecclesia quam Judas, qui (juxta Augustinum) unus erat ex Discipulis Domini, & tamen jam typum gerebat hæreticorum ab Ecclesia dissidentium: ex verba ejus tract. 61. in Joan. *Vnus numero, non merito, unus specie, non virtute, commixtione corporali, non vinculo spiritali, carnis adjunctione, non cordis sociis unitate: qui enim doctrinæ varietati noxiæ, non Ecclesiæ Vnitati, sed divisioni student.* Quid aliud machinantur, qui tot novis doctrinis & Prædicatorum Cathedras, & Confessariorum Tribunalia implent? nonnè divisionem amant qui directissimè contra voluntatem Alexandri VII. censurant sententiam *de sufficientia attritionis ex metu gehennæ?* dividunt re-

vera & non colligunt animos: undè legant Decretum Sanctissimi feria V. die 5. Maij 1667. emanatum, & culpas agnoscentes Ecclesiæ uniantur in vera submissione & Reverentia erga Romanum Pontificem.

Unionem amas? noli docere Absolutionem Sacramentalem non posse à Sacerdote impertiri nisi peracta satisfactione; aliqui id ipsum dogma in Petro de Osma damnatum, & fulmine Apostolico percussum inclamant: approbat SS. D. Innocentius XI. in Bulla quæ incipit, *Cum ad aures*, &c. data Romæ 12. Feb. 1679. frequentem Communionem, & ait: *Episcopi autem, in quorum Diœcesibus viget hujusmodi devotio erga SS. Sacramentum, pro illa gratias Deo agant, eamq; ipsi, adhibito prudentia & judicij temperamento, alere debebunt, &c.* frequentem à venialibus Absolutionem, eamq; salutarem ex Tridentino probamus, hanc improbare est schisma excitare, sanctas Monialium aliarumq; animas turbare, fructum Sacramenti Pœnitentiæ impedire, Monasteria devotione & pace privari. Quid dicam? doctrina aliquorum hypocrisis est, juxta Chrysologum, qui sermone 7. ait: *secura simulat, fallit prospera, curiosa mentitur, & crudeli arte virtutes truncat mucrone virtutum.... & misericordiam miseratione prostermit.*

Nonne Vnitatem Ecclesiæ lædunt, qui decreta Pontificum non observant? nonne SS. D. Clemens IX. 20. Aprilis 1668. Pontificatus anno primo per expressam Bullam, quæ incipit, *Debitum Pastoralis Officij*, &c. omnibus famosam  
imo



imo hæreticam versionem gallicam novi Testamenti Montibus Hannoniæ , Lugduni , seu potius Bruxellæ typis editam prohibuit ? prohibuit sanè : qui ergo eandem retinent , vendunt , imo suis legendam proponunt , & pro Sacramentali satisfactione ut legant imponunt , nonne perturbatores *Vnitatis Dogmaticæ* censendi sunt ? quis magister in Israël , & hæc ignorat ? imo , quis sani iudicii hæc non palpet ? quis etiam , alioquin cæcus , hoc scélus non videt ? si vis ergo esse Catholicus ? *Vnitatem dogmaticam* cole , summumq; Pontificem , ejusq; Decreta revere nobiscum.

Sed cheu ! quid Belgium non obstupescit ? interdixit omnibus SS. D. Alexander VII. feria 5. die 6. Septembris 1657. ne quis legeret aut retineret *Litteras Provinciales Montaltij* , &c. quid facitis quoad hoc Novatores ? Conscientia vestra sit vobis testis ; quomodo *Wendrochius* in vestris versetur manibus non ignoratis , Liber dictus *Rituel d'Alet* sive *Rituale Aletense* contra Bullam SS. Domini Clementis IX. datam Romæ die 9. Aprilis 1668. qui legit Bullam & contemnit , violat *Vnitatem* desideratam. Attendite precor qui verbum paternum contemnitis , doctrinam sanam mutilatis , & dividitis portionem vitæ æternæ : accessit ad Christum Dominum quidam de turba , & ait , magister dic fratri meo , ut dividat mecum hæreditatem , ad quem Dominus : homo , quis me constituit Iudicem aut divisorem super vos ? Luc. 12. v. 13. explanat hanc responsionem D. Petrus Chrysologus serm. 162. præcepit , inquit , cupiditas & incanta eum fieri voluit



*luit divisionis Authorem , qui ad restituendam venerat humani generis Vnitatem.* Si igitur Christus Dominus hereditatem duobus fratribus debitam inter eos dividere noluit , quo pacto vos , tamquam proprii Judices , hereditatem Patrum antiquam sanamq; doctrinam dividitis ? dividitis si vos summo Pontifici , ejusq; infallibilitati non submittitis , dum Bullas , quæ vobis placent , recipitis , & displicentes despiciatis. Sequimini Jesum , qui venit ad restituendam humani generis *Vnitatem* , & videte , ne præceps cupiditas & incauta vos fieri velit divisionis Authores , ne dicatis aliqua , quæ non oportent , turpis lucri gratia : qualia docuit Author monitorum minimè revera salutarium : non enim ex zelo , sed potius ex invidia contra Religiosos B. V. Mariæ cultores discretos monita illa damnata diabolus conflavit , uti peroptimè ostendit Clypeus Religionis , hoc anno 1679. in lucem editus : concursus enim populi extraordinarius ad BB. Virginem colendam ad Religiosorum Tempia , Imaginum Templorumq; ornatus Catholicus & debitus , Altarium nitor , Indulgentiarum copia oculos malevolentium offuscarunt , ut instar furibundorum calamo suo in domum Dei involent , destituentes Imagines B. V. M. aliorumq; Sanctorum pretiosis vestibus , sub specioso charitatis erga nudos egenosq; titulo.

In charitate sincera , si habetis , vos laudo . sed in hoc non laudo , quod prius Imagines vestibus , Tempia ornatu , quam vos ipsos sericis pannis & vestibus , pinguibus redditibus orba-

ri velitis : ex proprijs prius sustentate miseros, non ex alienis : non totum mare epotandum est , ut sciat<sup>r</sup> aquam ejus esse falsam : non diu dubitandum unde proveniant libelli illi divisionem continentes ; nam de modernorum stirpe hæreticorum scitote habere parentem : sapiunt nativitatis suæ solum , parentumq<sup>ue</sup> insigniuntur notis : si enim ibi legeris calumnias in summum Pontificem , in Religiosos , aut , ut per contemptum dicunt , in Monachos, si ibi legeris blasphemias in SS. Eucharistiæ Sacramentum , in Deiparam , in Sanctos eorumq<sup>ue</sup> Imagines ; si in illis offenderis ( ut ait Paulus 1. Thim. 6. ) *profanas vocum novitates* , quibus SS. Dei Matrem appellant , *Mariam Fabri* , vulgò *Mayken Timmermans* , Fœminam similem cœteris , ejus statuas *puerorum esse pupulas* , vulgò *kinder-poppen* , ejus Scapulare viles pannos , vulgò *lappekens* , & sacrarum Imaginum ac Reliquiarum apparatus, *Officinas Monachorum* , quæstus causa erectas, &c. tales libellos combure tamquam hæreticos & schismaticos: similia ore proferentes , Judæ sunt , & hos de vita 2. Tim. 3.

Sed quâ ita fit , ut novi hi Apostoli libellos suos adeò latenter fideli populo obtrudant ? in promptu causa est ; quia , ut Joannes cap. 3. *dilexerunt homines magis tenebras quam lucem* , erant enim mala eorum opera : omnis enim qui male agit odit lucem , & non venit ad lucem , ut non arguantur opera ejus : qui autem facit veritatem , venit ad lucem , ut manifestentur opera ejus , quia in Deo facta sunt. Ita est : quærit latèrè qui quærit peccare , decipere & absque notâ veritatem improbare :

non docuit hanc methodum reformandi Christus, qui palam loquebatur judæis; palam in ipsorummet Synagogis prædicabat, & Apostolos docuit Matt. cap. 10. *prædicate super terram*: non in antris, non in clancularijs conventiculis, ut nostrorum reformatorum antesignani Lutherus & Calvinus factitarunt, teste Florimundo Ræmundo lib. 7. & 8.

Verum est quidem & veritatis discipulos sua quandoq; suppressere nomina, & libros suos, nihil nisi veritatem, charitatem, *Vnitatem* spirantes, Anonymos emittere: verum veniâ digni sunt; id enim faciunt, vel quia vanas fugiunt gloriolas, vel ut quorundam malevolorum sibiq; infensorum, multâ etiam auctoritate valentium, odium, invidiam, veritate tamen propalatâ, evitarent: uti perbellè præstitit ille, qui nuper, sub typo *Ignis fatuus* inordinatam novatorum nostrorum redarguit charitatem.

Vis ulterius digito monstrari quomodo *Vnitas dogmatica* lædatur? en responsio in promptu est: dum Scripturam Sacram ad proprii Spiritus motum, & non ex SS. Patrum Ecclesiæq; mente explicant; & hinc turbatio, hinc erroris patet origo: ut enim lego apud Augustinum lib. 834. Q. 469. *non potest error oriri palliatus nomine Christiano, nisi de Scripturis non intellectis*: & quomodo Scripturam intelligent, si explicationem Patrum respuant, proprio captui fidentes? sic verbum Dei corrumpitur, *dogmatica* scinditur *Vnitas*, ut benè ostendit *Canisius*, qui integrum tomum suppeditat *de corruptelis Verbi Dei*: nec  
 minori



minori laude & fructu nuper notas edidit do-  
 ctissimas Eximius Dominus *Nicolaus de Bois*, Sa-  
 crarum litterarum in Universitate Lovaniensi  
 Primarius & Regius Professor, in novum Te-  
 stamentum ( de quo ante ) gallicè nuper edi-  
 tum, & à S. Sede damnatum. Ex proprio  
 passionato imò hæretico spiritu prodiit libellus,  
 cui titulus *Catechisme de la grace*, ut continens er-  
 rores à Pio V. Gregorio XIII. Urbano VIII.  
 per Innocentium X. feria 5. die 6. Octobris  
 1650. damnatus: qui est ille ipse libellus, qui  
 nuper iterum protrusus est in lucem, sed no-  
 vum habens titulum: *Esclaireissement sur quelques  
 difficultés touchant la grace*, &c. à Liege chez la  
*Vesve Streel*, avec permission des Superieurs. 1679.  
 ut autem *Vnitatem dogmaticam* magis dividant,  
 infames libellos, utpotè propter hæreses con-  
 tentas tortorum manibus in Gallia igni tradi-  
 tos, in vulgus spargunt. Nunquid Beginis,  
 Monialibus, indoctæ plebeculæ nuper libel-  
 lum similem à S. Sede damnatum, cui titulus  
*Miroir de la pieté chrestienne*, &c. pro speculo  
 pietatis obtruserunt? vidi cum dolore, ac ve-  
 hementer ingemui; nam sic, loco devoti li-  
 belli venerabilis Thomæ à Kempis, speculum  
 promovent impietatis; ut divertant populum  
 Christianum à Christiana simplicitate, ut sic  
 Sacerdotium regale contemnatur, & novis do-  
 ctrinis antiqua lædatur *Vnitas*: imo videntur  
 non ulli facultatem dare velle plebi sententiam  
 ferendi in rebus Theologicis; non enim video  
 in quem alium finem omnes illas controversias  
 modernas ex idiomatè latino, in scholis usitato,

in Flandricum aut Gallicum transferant. Utinam ejusmodi intenderent & attenderent Chrysologo dicenti Sermone 53. *Sacerdotis est admonere quod decet, plebis est audire quod monet, quidquid non licet, Pastoris est prohibere, gregis audire ac velle ne fiat. Viraq; si convenient salva sunt omnia, nec Deus invenit in plebe quod puniat, nec Sacerdos potest habere quod doleat.* In artibus mechanicis nullus est qui alterius opus audeat judicare vel in eò defectum notare, si examinandus est Sator non advocatur futor ut eum examinet: in Theologia autem, in re tam difficili, omnes volunt sententiam ferre etiam mulierculæ, unusquisque decreta sua rata esse vult, divinæ illius sapientiæ authoritatem minuens suis erroneis & novellis sententijs: sed undè hæc mala omnia, nisi deficiente *Vnitate dogmatica?*

Quod si enimvero inter Theologos foret pax & concordia, non tam indiscrete aliqui arcana omnia scholastica indoctis pueris & mulierculis revelarent, ut aliquod ab eis suæ sententiæ patrocinium acquirerent, quod apud doctos Viros invenire nequeunt: quod unum, mature consideratum, foret sufficiens apud cordatos sistendis intumescentium illorum ingeniorum fluctibus repagulum. Hanc aliquorum imprudentiam, ne dicam impudentiam, *fatalem* appellat ingeniorum *scabiem* in suis polytici polyticus Lipsius, libro scilicet de una Religione contra Dialogistam: *Iure sic loquor, inquit, & profecto velut à Calo & ab astro aliquo est hac pestis, atq; ut corporum quidam morbi certis temporibus interveniunt, sic nunc iste animorum*



*moru n : Viri , famina , senes , pueri quæstiunculis  
 ludunt & lasciviunt , eoq̃ ventum ut pro parum sano  
 sit , qui non sic insanit. Mystrium Theologia erat ,  
 facta est populare oblectamentum ; vis Imaginem cla-  
 ram horum temporum ? Nicephori Gregorij ? ista lege :  
 apud nos etiam opificibus effusa sunt arcana Theologia ,  
 atq̃ ita omnes inhiant ratiocinatiunculis & sermonibus  
 syllogisticis , ut herba & pascuis ( Hist. lib. I I. ) ar-  
 menta , & illi qui de recta Fide ambigui sunt , &  
 qui nec quomodo credendum sit sciunt , nec quid sit il-  
 lud quod credere se dicunt , illi inquam & fora &  
 porticus & theatra omnia Theologia compleverunt ,  
 neque solem hunc testem facere impudentia sua reve-  
 rentur. Quomodo autem non sit absurdissimum , olim  
 quidem cum florerent gentilium Dogmata , ordinem  
 aliquem fuisse , & arcana quæ Delphorum Theologis  
 commissa erant nulli alij edicere vel indagare licuisse ,  
 siue is Plato siue Socrates , aut alius sapientia celebris  
 fuisset : apud nos verò , qui purum pietatis Myste-  
 rium profiteamur , ita profanari res Divinas , & om-  
 nibus qui de Theologia differere volunt id licere suopie  
 arbitrio & suffragio ? Jam dissidia & ambitio-  
 nem , quæ inter capita factionum & Duces pul-  
 chrè idem exprimit & deplorat : Factionum ve-  
 rò Principes inter se digladiabantur , & linguas con-  
 tra se mutuo armabant , non zelo Divino sed iracun-  
 dia impetu ducti : nam qui secundum Deum est ze-  
 lus , à superna potentia dependet , & Divinâ qua-  
 dam ac moderata concinnaq̃ ratione gubernatur :  
 qui verò mentis suæ fores ambitioni aperiunt , ij non  
 vident zelum suum in amulationem & odium converti  
 & pro frumento , uva , ceterisq̃ bonis fructibus , spinis  
 & tribulis.*

Unde



Unde qui rixis & contentionibus Theologiam replent , aut replere student , hi Theologiam ipsam annihilare quærunt : Theologia enim est vera & perfecta hominis sapientia ; quid autem sit sapientia definivit D. Bernardus , cum dixit , sapientia est sapida scientia : Est , juxta nomen ejus Latinum , sapida & suavis scientia : sed nunquid Theologiam destruunt , qui hanc suavem & sapidam scientiam convertunt in amaritudinem discordiarum & dissensionum Scholasticarum ? Sapientia Theologica est sapidus quidam divinarum rerum gustus , certum est quod non invenitur altercantibus & divisis cordibus : non discordia , sed *Pax Fratrum* ( juxta Chrysologum Sermone 53. ) *voluntas est Dei , jucunditas Christi perfectio est sanctitatis , justitia regula , magistra doctrinae , morum custodia , atque in rebus omnibus laudabilis disciplina.* Dissensiones in doctrinalibus concomitantes habent , contentionem in ore , de quâ Apostolis 2. Tim. 2. *Noli verbis contendere ; & discordiam in corde : unde sicut contentio contrarietatem quandam importat in locutione , sic discordia contrarietatem quandam importat in voluntate ; ita ut , quando non est unio opinionum , rarò sit unio voluntatum : Vnitas doctrinalis est unitas quædam particularis aliquorum ad invicem : Vnitas autem particularis aliquorum ad invicem ordinatur* ( ut D. Thomas 2. 2. q. 39. art. 1. ) *ad unitatem Ecclesiæ , sicut compositio singulorum membrorum in corpore naturali ordinatur ad totius corporis unitatem.*

• Attendite quæso , dum Cathedras ascenditis  
vel

vel in Scholis vel in Templis , nil amari in fratrem lingua proferat nil novi ; ut ædificetur per vos Templum Spiritus sancti , quod est anima fidelis : si enim voluit Deus , ut duo Reges & natione & religione diversi , Salomon & Hiram , magnam in amicitiam conspirarent , ad Templum Jerozolyms ædificandum : *Erat Pax* ( inquit Textus ) *inter Hiram & Salomonem , & percusserunt ambo fadus.* 3. Reg. 5. v. 12. quanto magis illi qui incumbunt dilatandæ Ecclesiæ , Evangelio prædicando , esse debent , non tam sanguine , quam amore Germani ? *Non enim* ( inquit D. Paulus Rom. 10. v. 12. *est distinctio Indai & Graci* : quod planè verum est , cum illi omnes in eandem fidei & charitatis necessitudinem coalescunt : Unum ergo faciat charitas , quos natura aut patria facit esse diversos. Quod mihi videtur Ecclesiæ à Deo verbis postulare Davidis , dicens : *Latetur cor meum , ut timeat nomen tuum.* Psalmo 85. v. 11. seu , ut legit & exponit D. Hieronymus , *unicum fac cor meum , ne sit multiplex , & divisum in plures cultus eorum* : non enim debent Principes & Doctores Ecclesiæ , Theologiæ Magistri , Verbi Dei præcones ( qui in medio illius sunt instar cordis ) in diversas sententias , tanquam in plures partes diffecari.

Hanc *Vnitatem* promovere admonitionibus sacris , hanc discordiam impedire gladio spirituali deberent Summi Pastores: sed quid dicendum? si pars una noxiâ gaudet libertate simul & auctoritate; alii, dum veritatem christianè & debitè defendunt, à concionibus suspenduntur innocentes ;

ut non sit qui possit contradicere spiritibus malignis : *Sic parcunt corvis, vexat censura Columbas;* hocq; falsis testimoniis aliquando apud Episcopos Novatores efficiunt, ut non propaletur venenum quod sub novellis doctrinis latet : deinde ait : Gregorius in caput 24. Job cap. 22. *Hæretici ideo eos conantur auferre qui prædicant, ut eorum etiam sequaces trahant :* quod si authentice probetur novatorum quempiam scandalose (tamquam verum impostorem) scommata in integras Religiones etiam ex Cathedris effudisse; imo si Calvinum & Lutherum, pestes illas terribilissimas, non tantum veneni protulisse, quam Religiosos aliquos, asserat, &c. ô venenata verba : quod si ( dico ) talia impune permittantur : quod si indebite negetur Paschalis Communio, immo & Ecclesiastica Catholico sepultura, & tales non feriantur gladio spirituali. Quid dicendum ? dicit D. Bernardus, non ego : Serm. 66. in fine : *Dolendum valde quod non solum laici Principes, sed & quidam de clero, nec non ordine Episcoporum, qui eos magis persequi debuerant, propter quæstum sustineant, accipientes ab eis munera & quomodo ( inquiunt ) damnabimus nec convictos nec confessos ?* Quamvis hæc verba in hac patria nullo modo vera autumo & spero: attamen proponit D. Bernardus, quomodo nimis cum hominibus discolis aliquando dissimuletur : & propter unum ( ut ipsi faveatur ) omnia effugia adhibeantur, & alius inaudita parte, ratione negata, ex falso testimonio condemnentur : quod si quis similis inveniretur ( quod Deus avertat ) nonne talem Episcopum causam



fam scandali & schismatis existimares? sine dubio : hunc tamen laudarent , hunc Novatores extollerent , uti factum scribit de Donato Augustinus Fragm. cap. 6. *Donatum (ait) Donatistæ pro Christo habent , si audiant aliquem detrahentem Christo , forsitan patienter ferant , quam si audiant detrahentem Donato.* Sic interesse dominabatur & dividebat : sed ut de unitate sermo progrediatur : Cogitate quibus verbis Deus Ecclesiam sponsam suam alloquitur , dum hæc legis verba. Cant. 4. v. 9. *Vulnerasti cor meum in unô oculorum tuorum* : per oculos , Rectores Doctoresque Ecclesiæ intelliguntur , eorumque Vnitas declaratur amabilis ; sic enim interpretatur D. Thomas : *Bene , inquit , cum superius pluraliter dixerit oculos : hic singulariter in uno oculo dixit , ut per hoc unitas Sanctorum , Doctorum , Prædicatorum , exprimatur.* Quæ Deo placebit , si superior æquali charitate & zelô , in vinculô pacis omnes complectatur ; tunc sanctum opus subditorum erit in concordia non ficta ; sicque educet in manu Ecclesiasticâ Filios Israël Altissimus ad terram promissam : nam , dum ait Scriptura sacra ; quomodo Deus eduxit populum suum de Ægyptô , in manu Moysi & Aâron , Num. 33. v. 1. reflectit Origenes Hom. 27. *in manu Moysi & Aâron eduxit eos Dominus , & non in manibus : unum enim opus utriusque manus est , atque una perfectionis expletio* : ac si illi duo Hebræorum ductores tantam inter se concordiam haberent in operando , ut unâ eademque manu usi viderentur : unde , sicut eâdem uterque manu , ita còdem uterque sceptrô utebatur :

patet

pâter ex eô , quod Moyſes Aâron allocutus dixerit : *Tolle virgam tuam*. Exodi 7. v. 9. cur potiùs non dixit : *Tolle virgam meam* ? Moyſi enim data fuerat virga illa, non Aâroni, ut patet Exodi 4. v. 17. reſpondet D. Auguſtinus q. 20. in Exodum : *Erat utrique illa virga communis , ut cujuſlibet eorum diceretur, verum diceretur*. Ut Vnitas prædicta concorditer poſſideatur, neceſſe eſt ; ut virga Episcopalis omnibus ſit communis ; feriat delinquentes , ſuſtentet innocentes : ſi enim unus deſpiciatur , alter exaltetur , ſecundum *conſilium aliquorum* , & non paternè recipiantur charitate Apoſtolicâ , quomodò Regnum Dei ſtabit ?

Ut autem ſit *Vnitas Dogmatica* , æſtimanda SS. Patrum dogmata : plena autem ſunt hæreticorum ſcripta impropertiis in Patres, quos erroris , contradiccionis & tenebrarum accuſant , ut liberius jugum authoritatis excutiant. Hos ſecutus videtur Jânſenius , qui Patres Auguſtinô anteriores paſſim erroris Pelagiani & Semipelagiani accuſat : undè nec habenda ipſi fides , dum ait : Auguſtinum Eccleſiæ , non Eccleſiam Auguſtino tradidiſſe doctrinam de gratiâ. En quam ſibi contrarius ! contempe-  
mini , ſi placet , quanti authoritatem Auguſtini & ipſe , & Novatores , æſtimaverit ; delegit hunc ex omnibus venerandum : præterquam tamen quod tribuendo falſas & damnatas illi ſententias , ac patribus aliis contrarium ſtatuendo , quantum in ſe fuerit , authoritatem ejus in diſcrimen adduxerit , non eſt veritus ei errores plures adſcribere tom. 1. lib. 8. cap. 15.



viginti circiter annis Episcopo scribenti , lib.  
 de Spiritu & litt. cap. 33. Semipelagianum erro-  
 rem assignat , sed falsissimè , lib. 3. de Statu  
 naturæ puræ cap 19. Augustino adscribere non  
 dubitat , quæ , iudicio suo *ad diversas impietates,  
 ad blasphemiam in Deum , ad Manichæismum cogunt*  
 lib. 3. de Gratia Christi cap. 20. vult eum cum  
 Pelagianis omnibus in intellectu loci illius ex  
 Apostolo *Deus vult omnes , &c. usque ad Episco-*  
*patum Hallucinatum.* Quid obstupescitis ? nolite  
 mirari ; tales enim sese omnibus , etiam SS. Pa-  
 tribus , proferunt , & quod somniant dicunt :  
 Sic & Novatores omnia sua in sacris litteris fun-  
 data asserunt , & spiritum suum spiritui anti-  
 quorum Patrum præferunt ; imò & Summo  
 Pontifici , si quid adversus eos definit. Cum  
 tamen S. Cyprianus lib. 1. Epist. 3. ait : *Neque*  
*enim aliunde hæreses oborta sunt , aut nata sunt schis-*  
*mata , quam inde , quod Sacerdoti Dei non obtem-*  
*peratur , nec unus in Ecclesia ad tempus Sacerdos ,*  
*& ad tempus Index , vice Christi , cogitatur.*  
 Adde & D. Thomam 2. 2. q. 11. art. 2. ad 3.  
*Hæreticus censetur , qui pertinaciter repugnat determi-*  
*natis auctoritate universalis Ecclesie , quæ quidem*  
*auctoritas principaliter residet in Summo Pontifice :*  
*contra cujus auctoritatem nec Hieronymus , nec Augu-*  
*stinus , nec aliquis sacrorum Doëtorum suam senten-*  
*tiam defendit.* Sequuntur hunc SS. Patres ,  
 nos autem & hos veneremur. Quanti ergo ab  
 Ecclesiâ Catholicâ auctoritas SS. Patrum sit  
 æstimanda , disce à Conciliis generalibus , præ-  
 fertim à magno Chalcedonensi Concilio Act.  
 1. & 2. lege sensum Ecclesiæ Rom. lect. 6.



Festi S. Gregorii magni in Brev. Rom. ubi affirmat , quod SS. hic Pontifex quatuor Conciliis Nicano , Constantinopolitano , Ephesino , Chalcedonensi tamquam quatuor Evangeliiis honorem haberi voluit : omnia vero horum Decreta ex SS. Patrum sententiis sunt collecta : à Mariano Augusto ( ut in Epist. Famil. quinto capite disertissimè scribit Eximius P. ac M. Christianus Lupus, ex Ordine S. P. Aug. Doctor Lovaniensis ) admoniti Episcopi ; in magna Synodo Chalcedonensi , quatenus læsam ab Eutychete fidem , non tantum juxta tres Priores Generales Synodos , sed & juxta Gregorii , Basilii Athanasii , Hilarii , Ambrosii , Cyrilli , aliorumque Patrum traditionem firmarent , una voce responderunt : Docuerunt Patres , & in scriptis custodiuntur , quæ ab eis sunt exposita , & citra ea dicere non possumus. Et gloriosissimis iudicibus fidei definitionem tandem condi urgentibus , denuo responderunt : Si jubetis nobis dari inducias , petimus Patres simul perscrutari , & edita tandem fidei definitio hoc habuit exordium : Inerrabilem Patrum renovavimus fidem. Et rursus. Sequentes igitur sanctos Patres. Et sextæ generalis Synodi ad Constantinum Augustum sermo acclamatorius hæc habuit. Paternas traditiones secuti sumus , & nihil dissonum aut discrepans ab eorum informatione adinvenimus : & legite quæ ad Marcum Ephesiorum Metropolitam dixerit in Florentinâ Synodo Frater Joannes de Monte Nigro : hæc ejus sunt verba : Sanctus Basilius & hujusmodi Doctores , sunt fundamenta nostra fidei. Et infra. Ego dixi vobis illud , in quod ultimo sancti Patres

*generalium Conciliorum omnia resolvebant , semper fuisse SS. Patrum testimonia , ita ut in unaquaque definitione Fidei decretum edituri proferrent Patrum testimonia , & omnes acquiescerent. Proinde nos veri Catholici dicimus, quod generalia Ecclesiæ Concilia , & Sancti Patres sint duo Seraphim , qui ultro citroque cantant honorem Deo omnipotenti ac sese invicem inerrabili autoritate sustentant , nosque in vera Fide confirmant.*

Quod si Novatores sanctos æstimarent Patres , & summi Pontificis definientis revererentur infallibilitatem , salva essent omnia. Nec mihi indignemini, quod vos indigitem nomine Novatorum , cum de antiquis gloriamini Canonibus ? dico vobis cum Cretensi ; *valeant novitates partim ex inscitia , partim ex intolerantia arrogantia nata. Et quisquis ( S. loquitur Hieronymus Epist. ad Pamach. ) assertor es novorum Dogmatum , quæso ut parcas Romanis auribus ; parcas Fidei , quæ Apostolorum ore laudata est. Sed dicetis, dicta hactenus adversus novitates ad nos nihil , qui non novorum sumus architecti dogmatum , non novos cudimus Religionis ritus ; at verò antiquos Ecclesiæ instauramus Canones , ac primitivorum Fidelium praxes ; quinimò novitates insectari unicum nostrum studium est. hæc quidem speciosè jactant , quotquot sese Ecclesiæ ingerunt , quantumvis importunè reformandæ : at Viri sapientissimi ac genuinò zelo accensi jam dudum has larvas detraxerunt : quod verò ad hunc nostrum discursum spectat , illud vos scire velim ; non eos solum super inducere nova , qui dogmatizant planè recentia ,*



sed & illos , qui contra præsentem pacificè ac legitimè possidentem consuetudinem , absque legitimâ autoritate opportunè importunè moluntur restituere eos usus ac praxes ; quæ cum nuper quidem fuerint , modò sint abolitæ , idq; Ecclesiâ universâ , ejusq; summò Pastore Romano Pontifice pænitus sciente & approbante : hi inquam , nova quoq; inducunt inventa ( juxta *Calepini* vocis *novus* interpretationem ) & tumultus causant , ac meditata Concordiæ insidias struunt. Ut autem vobis ad oculum hoc sit demonstratum , subjectas solum Ecclesiæ primitivæ ac antiquæ cupio observari ac contemplari praxes & Canones.

*Primò* , an non meritò haberetur Novator , qui Ecclesiarum Antistites ad Apostolorum ac Discipulorum Christi adniteretur reducere paupertatem ac simplicitatem , velletq; proinde , hic præsertim Belgio , eos incedere pedestres , aut nudipedes , absq; Rhedis , & honorificò famulatu ? *Secundò* , nonne nova divenderet , qui Clerum universum communem juberet ducere vitam , ut primitus servatum fuit in Ecclesia ? *Tertio* , an non nova induceret , qui hodie vellet etiam à Laïcis Eucharistiam domum deferri , suo tempore sumendam , ac per vias ad pectus deportandam , ut antiquitus practitatum tradit *Spondanus* ad annum Christi 57. Quid ad hæc adferre potestis ? quid respondere , qui re novatores estis , & nomine carere vultis. Sed pergitte mecum Antiquitatem perscrutari. En *Quartò* , Canone 39. Concilii Altifiodorensis : *Vnaquæq; mulier , quando communicat , Domini*



nicale suum habeat, quod si non habuerit, usque in  
 alium diem Dominicum non communicet : Dominica  
 cale erat mundum lintheum, quo foeminae reci-  
 piebant Sacram Eucharistiam. Quinto, Caput  
 51. Concilii Carthaginensis 4. 214. Episcopo-  
 rum hæc habet verba : Clericus, quantumlibet  
 verbo Dei eruditus, artificio victum quærat : O Do-  
 mini mei, hæc verba semel repetite, & manus  
 vestras respicite. Sexto, addatur Caput 52. ejus-  
 dem, ubi sic : Clericus victum & vestimentum sibi  
 artificio vel agriculturâ, absque officii sui detrimento  
 præparet. Septimo, Capite 53. ejusdem : Omnes  
 Clerici, qui ad operandum validi sunt, artificio &  
 litteras discant. Octavo, ad solatium pauperum  
 Religiosorum, qui nomine Fratrum denotari  
 solent, habetur Capite 54. ejusdem : Clericus  
 invidens Fratrum profectibus, donec in vitio est, non  
 promoveatur. Vultis, antiquorum Canonum de-  
 clamatores, adhuc alios desideratis forsan,  
 tamquam publicæ poenitentiae Præcones, Ca-  
 nones poenitentiales? en adsunt : Ait Canon  
 1. Poenitentialis : Quod si Presbyter fornicationem  
 fecerit, Poenitentiam decem annorum faciat, hoc mo-  
 dō : scilicet quod sit inclusus, sive à ceteris in aliquo  
 locō remotus, sacco indutus, & humi prostratus mi-  
 sericordiam Dei implorans. Ubi consequentur aliæ  
 plurimæ præscribuntur austeritates publicæ ac  
 privatae : an fortè illas vultis introducere? Ca-  
 non secundus poenitentialis primo jungatur, ubi  
 sic habetur : Si Presbyter cognovit Filiam suam spi-  
 ritualem : quam scilicet baptizavit, vel in Baptis-  
 mo vel in Confirmatione tenuit, vel qua sibi confessa  
 fuerit, debet Poenitentiam agere duodecim annis.

Habet & Canon pœnitentialis trigessimus hæc verba : *Qui blasphemaverit publicè Deum , vel aliquem Sanctorum , & maximè B. Virginem (ô utinam hæc legerent omnes Ante-mariani ! ) illi debet Episcopus hanc Pœnitentiam injungere : scilicet , ut septem diebus Dominicis præ foribus Ecclesia in manifesto dum Missa cantatur ; existat , & ultimo illorum dierum Dominicorum pallium & calceamenta deponat , & corrigiam ligatam circa collum habeat ; & septem præcedentibus sextis feriis in panè & aqua jejunet , nullatenus Ecclesiam ingressurus : & aliis pœnis superadditis.*

Quid dicis jam indiscrete monitor ? Apostolorum Canon 9. hæc nobis exhibet : *Quicumq; Fideles Ecclesiam ingrediuntur , & Scripturas audiunt , neque apud Precos & Sanctam Communionem permanent , eos tamquam qui Ordinis in Ecclesia perturbationem ,* *NOTA BENE ,* *inducant , à Communionem arceri oportet.* Adest & Canon 53. Apostolorum , qui sic se habet : *Si quis Clericus in Caupona cibum capere deprehensus fuerit , à Communionem excluditur.* Et Canon 56. Apostolorum declarat : *Si quis mancum , aut mutum , surdumvè aut cacum , aut eum , cui vitiosus incessus est , subsanaverit , Communionem privator ; consimiliter & Laicus.* Ulterius legite Canonem 59. Apostolorum , & invenietis hæc verba : *Si quis falso inscriptos impiorum libros tamquam Sacros in Ecclesia ad populi & Cleri corruptionem publicaverit , deponitor.*

Ultimò confiderate quid dicat Canon 51. Apostolorum : *Si quis Episcopus , aut Presbyter eum , qui à peccato revertitur , non recipit , sed rejicit , deponitor.* O Verba solantia miserum pec-



peccantis animum ! Si quis præmissas ( ex aliis innumeris ) primitivæ Ecclesiæ praxes , ac Canones omnes , aut fortè vel unum aliquem hodie adniteretur restaurare , vix dubito , & ne vix quidem quin ab ipsis antiquarum praxium ac Canonum recusoribus , aut exhibilaretur ut novus ac improvidus Dogmatistes , aut prescriberetur ut perniciosus pacis turbator. Liquido proindè constat , novorum aut novatorum nomina , nedum venire inaudita , ac nunquam usitata , sed & antiquata & abolita. Novatores ergò vos appello , propter rationem jam intimatam. Nolite interim ex hoc *Unitatis* meæ discursu sumere fœcundum discordiæ seminarium : Quod enim scribo , jure scribo , concordiæ causa scribo : Apis es , dulce pacis quærens legere mel ? oblatis per me flores dabunt. Aranea es ? & mel convertes in veneniferum fel: attende ad illa , quæ habet Benedictus XI. extravag. *inter cunctas* de privilegiis videlicet , *quod plerumque pariunt Novitates discordiam , præsertim dum ab eo , quod diu æquum visum est , per novam constitutionem receditur* ( & nota , quanto magis , quando propria auctoritate ) *nec quare recedatur utilitas evidens , aut alia causa subest.*

Cum ergò pariant , præter contentionem & discordiam , inter fideles Dogmaticæ dissentiones odium , quod è diametrò repugnat charitati , & per consequens tollit omnem *Unitatem* Ecclesiæ , quæ est effectus solius amoris seu charitatis : movet enim Spiritus sanctus per charitatem singulos fideles ad ea discenda &



docenda , quæ tota collectio Catholica proponit , quam ipse unctione suâ divinâ docet ; & per hoc ad constituendam *unam* Ecclesiam Catholicam , in *unitate* fidei & morum perenniter permanentem , instruitur.

Denique si finem Ecclesiæ spectes , hic *unus* est , nempe fidelium salus ; ad hoc *unum* omnia , quæ in Ecclesiâ sunt , tendunt : Quapropter Apostolus 1. Cor. 3. *Omnia* , inquit , *vestra sunt* , sive Paulus , sive Apollo , sive Cephæ ; id est , omnia ad vestram salutem instituta sunt. Sed si doctrina Christiana non est *una* , sed *divisa* ; & alia sit Pauli , alia Apollinis , alia vero Cephæ , non solum varietate opinionum , sed etiam divisione animorum , profecto non tendit illa ad salutem , sed ad perniciem animarum.

Ipsa doctrina Patrum ( quæ verè in se continet depositum veritatis ) ipsa nequidem in Ecclesia admittenda , nisi sit *una*. Videris itaque quam necessaria sit Ecclesiæ *Vnitas Dogmatica* , sive doctrinalis : ipse namque Spiritus sanctus , dividens singulis prout vult , voluit Ecclesiam Catholicam esse *unam* , non solum *unitate* fidei , sed etiam *unitate* doctrinali : hinc fit , ut inter Ecclesias , quæ videntur omninò separatæ , non solum oporteat sit convenientia in Fide , Spe , Charitate , & Sacramentis , sed etiam colligatio partis ad partem in *unitate Doctrina* , quæ est Ecclesiæ bonum , utpotè conservativum ipsius esse Ecclesiæ , in quantum unius totius rationem habet.

Solliciti igitur sitis servare *unitatem* spiritus in

in vinculo pacis : submittite vos in omnibus Ecclesiae sanctae Dei : Pontificis observata decreta infallibilia ; cui dico cum S. Bernardo lib: 2. ad Eugenium Papam ; *Tu Princeps Episcoporum , tu haeres Apostolorum , tu primatu Abel , gubernatu Noë , Patriarchatu Abraham , ordine Melchisedech , dignitate Aâron , auctoritate Moyses , judicatu Samuël , potestate Petrus , unctione Christus :* ut Ecclesia Dei , in pacis unitate fundata , perfectam in Christo teneat disciplinam , sicque B. V. MARIAE honor erit debitus , Pontifici Obedientia necessaria , Sacramentis praxis consueta & sancta , Deo gloria , qui est trinus & unus. Amen.

*Pars*

## PARS SECUNDA.

## UNITAS POLYTICA.

*Potestas & terror apud eum est , qui  
facit concordiam in sublimibus suis.*

Job 25. v. 2.

*Concordia fratrum & amor proximorum.*

Eccli. 25. v. 2.

**D**Ivvs Leo Papa Sermone 5. de Jejunio ait:  
*Contra communes hostes pro Salute communi ,  
una communis debet esse vigilantia : Cumq̃;  
omnis ille , qui Vnitatem dogmaticam lædit, etiam  
Polyticam turbare dignoscitur , omnibus tam  
Ecclesiasticis quam Polyticis vigilandum est  
pro salute communi. Hæc enim necessaria Vni-  
tas , hæc quippe est gluten , quô tam multa &  
diversa Reipublicæ membra conglutinantur ,  
unumq̃; efficiuntur.*

Loquens olim Deus ad Moysen , ait illi Ge-  
nesis 8. *Fac tibi Arcam de lignis levigatis , mansun-  
culas in ea facies , & bitumine linies intrinsecus &  
extrinsecus , ne scilicet aquæ ingredi possent :*  
hæc Arca non solum Ecclesiæ , sed cujuscumq̃;  
Reipublicæ benè constitutæ typum gessit ; de-  
bet enim hæc non minus quam illa bitumine  
charitatis intrinsecus & extrinsecus liniri, ne in-  
undantes dissensionum aquæ eam penetrent ,  
&



& à fluctibus hauriri faciant : & sicut ligna Arcæ illius oportuit dolari , & ex eis , ut optimè conjungerentur , nodos corticesq; proscindi , ita oportet & nos ab omnibus passionibus , rixis & contentionibus separari , & quasi ascia poliri ; alias proximis nostris in *Vnitate* pacis & amoris vinculo conjungi impossibile erit. Hæc omnia præstat *Vnitas doctrinalis* ; quod si enim unanimiter & uniformiter Prædicatores & Doctores populi imperfectiones & passiones interpretarentur , brevi forent in Republica , quasi ascia , polita omnia : sed si quis excusat quod alter arguit , quid mirum si adhuc varii in ea nodi & cortices simultatum & discordiarum inveniantur ? quid stupendum , si Reipublicæ membra tam diversa , per nexum fraternæ dilectionis non conjugantur ?

Inter Entis genera , ut volunt Philosophi , solum Relatio , Actio , & Passio jungunt separata. Actione & Passione junguntur Cœlum & terra : esse Relativo totum Universum ; sed maximè Respublica , quatenus est hominum collectio unita : ex qua unitate apponitur singulis de Republicâ esse relatum , scilicet esse partem unius numero populi , communitaris , &c. & per hoc unicuique eorum apponitur dependentia à totô : Sed per varietatem Dogmaticam dividitur homo ab homine , Civis à Cive disjungitur , & quod sæpius accidit , excussio communitalis jugo , aut legitimo Regis Imperiô , novum sibi Regiminis statum eligunt , in dissidio Reipublicæ & divisione lætantes. Civitas dicitur , quasi Civium unitas ; sed  
ibi

ibi difficilius servatur unitas, ubi magis periculum est ne distrahatur populus variis Religionibus. De multitudine vulgi ait S. Hieronymus in cap. 21. Matth. *Semper turba mobilis est, nec in proposita voluntate persistens, atque in morem fluctuum diversorumque ventorum huc illucque transfertur.* Unde superveniens novitas nociva est statui & regimini polytico, teste Gregorio Nazianzenô Orat. 1. de pace, ubi sic ait : *Nihil eos, qui sincero animi affectu Deum colunt, equè inter se conciliat, atque consentiens de Deo Doctrina; quemadmodum contra nihil ad dissidium ita promptum & paratum est, ut diversa in hac re animorum sententia.* Et sicut à mala arbore nullus fructus bonus, sic nil certius in Republicâ Catholica, quam à novitate omnia noxia nasci.

Naturale est Novatoribus tentare, imo dividere potentias Magnatum, Regibusque Coronas & Sceptra ( quantum possibile ) eripere, ac Monarchiam destruere. Vidit Gallia & legit aliquorum Novatorum libellum, sub titulô : *Expositio paraphrastica articulorum Confessionis Anglicæ, quò voluerunt sensum quasi Catholicum fraudibus dare : Audi quid habeatur Analysis Fidei lib. 2. fol. 273. Tandem cum ex pactis initis populum inter & supremam potestatem initium nanciscatur omnis Societas, &c.* Certè si quid hisce legibus contrarium juberet autoritas suprema, velletque apertè erigere Imperium voluntarium & gratuitum, ac diceret, stet pro ratione voluntas; eo ipso ab obedientiâ hujuscemodi præceptis exhibendâ liberarentur subditi ejus. Adde ejusdem lib. 2. cap. 9. pag. 464. verba hæc : *Iam supra diximus,*  
*omnem*



omnem auctoritatem seu potestatem Superiorem ex libero & rationi consentaneo pacto originem trahere. Et pag. 462. Certum & indubitatum est, omnem justa superioritatis & auctoritatis veram potestatem, ex pacto principium nancisci, hoc est; ex plurium libera consensione in suprema alicujus potestatis electionem. Et laudato cap. 9. Quod hactenus de non obtemperando dictum est, ad obstandum etiam transferri potest; quâ namque ratione subditi ab obsequio imperanti prestando liberati & soluti sunt, eodem jure illis etiam licebit eidem Imperio obistere, illudque oppugnare.

En dogmata novatorum, quæ ita tunc moverunt Polyticos & Regni Ministros, ut unanimiter concluderint, nullam proflus tolerari posse novitatem: nam sicut unitas Christiana Dogmatica causat polyticam quietem, sic divisio causat tumultum: undè in laudem Catholicæ Religionis ostendit Tertullianus in Apolog. cap. 1. quod verus Catholicus unitatis sit amans, nilque mali legibus Imperii etiam infidelis inferre possit aut velit, ait enim: *Quid hic deperit legibus in suo Regno dominantibus? si denotatur gloriatur, si accusatur non defenditur; interrogatus, vel ultro confiterur, damnatus gratias agit.* Et cap. 30. ostendit, quid debeat verus Catholicus agere respectu sui Superioris, dum dicit: *precantes sumus pro omnibus Imperatoribus, vitam illis prolixam, Imperium securum, domum tutam, exercitus fortes, senatum fidelem, populum probum, orbem quietum.* Docet enim Religio antiqua, quod orare teneamur non solum pro Imperatoribus, Regibus & Principibus terræ, sed quoque



que præceptum esse nobis etiam pro Inimicis orare , & persecutoribus nostris bona precari.

Econtra ; si petas à quodam Novatore , an sit Novator ? ab illo , qui Jansenismum profitetur ; an sit Jansenista ? Respondebit quod non ; dicet , non novi eam , nec doctrinam ejus. Si libros ipsorum legas & charitatem quæras , quam habere debent erga Episcopos , Doctores , Predicadores , aut alios Catholicos Romanos ipsis adversantes ; quæres , sed non invenies nisi injurias , scommata & anathemata , & , loco Præcum & Congratulationum , non reperiēs nisi maledictiones & impræcationes contra Reges : En quam longè differant à Spiritu antiquorum Patrum ! Propter hanc rationem infidelis *Solyman* audiens , quid de novitatibus Lutheri dixit : *Ecce homo , qui facile destruet Christianitatem* , & animadvertens , quod secta illa accresceret in Transylvania , Regina *Isabella* intimavit , quatenus ejusdem Professores ex Regnò propulsaret ; quia , ait , illorum novitates nil nisi schisma causare possunt , & Regni perditionem : undè & sapiens *Sigismundus* Rex Poloniae , restitit novitatibus , easdem inhibens sub pœna lese Majestatis divinæ & humanæ : at Filius , Patre mortuò , non volens sequi Consilia Eminentissimi Cardinalis *Hossi* , citò expertus est Regni Statusq; mutationem , acclamantibus Novatoribus , se Regem non noscere , nisi spinis coronatum.

*Moribus antiquis* , ait *Ennius stat Res Romana* ; doctrinâ antiquâ stabit Regnum , novâ evertetur. Ad hoc invigilent ergò omnes pro salute  
com-

communi & perenni ergà Monarcham nostrum  
 Reverentia in Fide Catholica , & sincerâ ergà  
 Summum Pontificem Obedientiâ , ne quid novi  
 irrepât : ad hæc autem requiritur potestas po-  
 lytica contra illos , qui summi Pastoris iussa ad  
 libitum suum solum observant ; vix quasi spi-  
 rituale fulmen timentes ; dum , non obstanti-  
 bus Censuris Ecclesiæ , in suâ pergunt novitate,  
 nec à Censuris in veros Ecclesiæ subditos ab-  
 stinent.

De hâc autem necessitate Leo Epist. 21. ad  
 Pulcheriam Augustam scribit : *Res humane ali-  
 ter tuta esse non possunt , nisi quæ ad divinam con-  
 fessionem pertinent , & Regia & Sacerdotalis defen-  
 dat autoritas.* Sacerdotalis ergò & Pontificia  
 per Regiam defendatur , hoc petunt omnes  
*Vnitatis Dogmatica & Polytica amantes* : ad hoc,  
 ut induceret Leo Theodosium Augustum , scrip-  
 sit in Epist. 24. hæc verba ( quæ utinam lege-  
 rent & ponderarent Monarchæ Catholici ! )  
*Cum enim , inquit , Ecclesia causâ statum Regni  
 vestri agamus & salutis , ut Provinciarum vestra-  
 rum quietò jure potiâmini , defendite contrâ heretic-  
 cos ( contra Novatores modernos ) inconcussam  
 Ecclesia statum ; ut & vestrum , Christi dexterâ , de-  
 fendatur Imperium.*

Ut ergò Antiquitas defendatur , hortatur  
 unio , quæ Ecclesiam inter & statum Christia-  
 num tam firma esse debet , quam unio corporis  
 & animæ : nam Ecclesia ( ut benè advertit ,  
*S. Franciscus de Sales* )  
 est statui Christiano , quod anima corpori ,  
 quorum agitationes & motus communes sunt :

Animæ



Animæ , ut principio vitæ ; corpori , ut sub-  
 jecto vitæ materiali : & sicut corpus ordina-  
 tum est , ut anima possit exercere sensibilia ,  
 sic status Christianus est ordinatus , ut pro Ec-  
 clesiâ executioni mandet decreta & mandata ,  
 sub tam severis poënis , ut Isaias dicat cap. 60.  
*Regnum , quod non servierit tibi , peribit.* Deinde,  
 cum Ecclesia sit infallibilis in doctrinâ & mori-  
 bus , Princeps Christianus permittere non po-  
 test , ut aliquas Novatores mutent leges ea-  
 rumque usum sine participatione criminis , casu  
 quo potest impedire : nam injunctum sibi of-  
 ficiū obligat ipsum , cum in statu suô sit Vice-  
 Rex Christi ( qui est *Rex Regum & Dominus do-  
 minantium* ) ut plus æstimet Ecclesiam , usque  
 ad consumationem sæculi permanentem , quam  
 status transitorios , quos sub se solâ , tamquam  
 membra , comprehendit.

Ulterius verò considera , quod schisma ( in-  
 cipiens per novitates in aliqua Regni parte )  
 hæresi periculosius sit , quæ notabilem secum  
 adfert distinctionem inter Christianos , tam  
 diversitate Templorum , Mysteriorum , quam  
 Fidei professione : At in schismate , in navi  
 Divi Petri omnia mixta : Cumque Domesti-  
 cum malum pejus, pejusq; schisma occultum ,  
 quam hæresis aperta : ad hanc enim expug-  
 nandam uniuntur omnes ; verum schismate  
 Ecclesia in se divisa portat semen belli civilis  
 in sinu suô. Ut autem pestis hæc innotescat ,  
 innotescat & simul quod Novatores semper af-  
 fectent speciosum habere titulum & nomen  
 Sanctitatis , austeræ vitæ , Ecclesiæ Reforma-



torum ; uti patuit in Lutherô , Calvinô , &c. quod animadvertens Bucero Erasmus dixit de Calvinô : *Video magnam pestem oriri in Ecclesiâ contra Ecclesiâ* : Si ergò Reformationis nomen audias , & auctoritatem Pontificis non adverteas , schisma time , & sub reformationis titulô hæresim pertimesce.

Quid non factum sub hoc titulô in causa Cornelii Jansenii ? ut reformaret materiam de gratiâ , nonne schismata causavit , & hæreses quinque peperit ? testes Pontifices Summi , qui fulmen Apostolicum in manu tenentes , suaviter tamen & prudenter in hâc tam gravi causâ procedentes , tandem Apostolica & infallibili auctoritate , etiam in sensu ab ipsô intento , easdem condemnarunt : Et cum omnia , quæ hætenus Belgium turbant , ab ipsô tamquam capite dependeant , atque ab hõc fonte venenatô dimanent rivuli amari modernæ doctrinæ ( non autem à 65. propositionibus , nuper à sancta Sede justè condemnatis , utpotè quarum plurimæ in hoc nostro Belgio fuere inauditæ ) perpaucis hîc aliqua notabo authentica ; quibus tacitè consideratis , eò melius indies accrescentes novitates impedire poteritis , dum Patri non dissimiles cognoscetis proles.

Maturè igitur , quæso , perpendite : primò , quod viri doctrinâ & zelô eminentes ex Novatorum scriptis , concionibus , Sacramentorum administrationis praxi ( taceo , quod loquantur de quinque propositionibus tamquam hæreticis condemnatis ) collegerint sequentia.

De-

Destruendas esse Indulgentias , quasi humanæ essent adinventiones ; simulq; annihilare Hyperdulix cultum Matris Dei, B.V. MARIAE; & Dulix Sanctorum; eorumque Imaginum; missam abrogare privatam, uti & Confessionem peccatorum venialium , usumq; SS. Eucharistix : ipsosque docere ignorantiam invincibilem nec affectatam non excusare à peccato ; omnes actiones peccatoris in mortali constituti , v. g. Orationes , Eleemosynæ , honor qui redditur Patri , &c. esse peccata mortalia : omnia quæ fiunt in Matrimonio sterilitatis , ratione ætatis aut aliter , mortalia coram Deo reputari delicta. Quod Episcopi cessent esse Episcopi , Magistratus esse Magistratus , &c. dum peccato mortali sunt obnoxii : Sequendum est quodcumq; motus interiores suggerunt contra Deum , Ecclesiam , Sereniss. Principes , Magistratus , &c. faciendam esse proportionatam Pœnitentiam peccatis ante Absolutionem : imò quod infirmi, facta Confessione , antequam Satisfactionem æqualem impleverint ; ad secundam obligati sint Confessionem ; quodq; ideò sæpius Absolutionem negent ; indeq; exurgunt miri illi & extraordinarii Pœnitentiarum modi ; quales sunt : quandò vinitori imponunt , ne unquam vinum bibat : dum nudis ventribus per plures horas super nudam humum feminis jacere mandant , aut indusio madido corpus refrigerare , ne tentationes superveniant : ex quibus aliæ sensibus , aliæ vita orbatae : quid mirum enim , si femellule , lymphæ frigidæ madidantes , per horas orantes ,  
 sic-



sicque se quieti reddentes , moriantur ? aliis autem ( quamvis non in quantitate notabili ) boum istar fœnum comedere injunxerunt.

Hic igitur diligenter perpendendum , an hæc Sanctorum Patrum , an verò diaboli inventa sint : nec hæc scriberem , nisi qualificatis viris nota illa esse scirem : Alia , quibus eorum libri pleni sunt , lectioni & judicio vestro committo. Hoc solum advertendum est , quod merum Calvinismum , alio autem modò coloratum , introducere gestiunt ; hoc & Jansenii litteræ , ad Abbatem Sancti Cyrani datæ , cura D. de Preville impressæ , clarissimè testantur : Quicquid librum , intitulatum Jansenii Augustinus , cum Institutionibus Calvinii conferre dignaretur , quo modò scilicet ejusdem doctrinam , probas , discursus & consequentias sequatur ; verè haberet quod miraretur. Informationes factæ juridicè cōtra prædictum D. Abbatem S. Cyrani , Catechismus ejus de gratia , liber de votis , & alia opera ; quæ in lucem dedit , clarissimè demonstrant , quod plura itinera Genevam , quam versus Romam confecerit. Si ergo Novatorum libri & litteræ doctrinâ erroneâ plenæ sint , nonne jurè merito affirmare possumus , quod , sub titulò Reformationis , schisma causare nitantur ; dum unicus eorum sit scopus ( ut ipsimet ajunt ) abusus tollere , antiquas praxes innovare , veteresque Canones introducere ?

Schisma times ? rem inspicè. Sed fortè quis dicat ; horrenda hæc , imò nec verosimilia sunt : Attende quæso , & , ne judiciari ad-



miratio præveniat , diligenter considera , quod ipsi Novatores ( probe scientes quàm odiosus huc usque Calvinismus Catholicis fuerit ) prorsus necessarium judicarint vel occultare , vel pro tempore simulare , illa scilicet per quæ populus averteretur : Ideoque has propositiones publicè rejecerunt : *Deus est Author peccati : Corpus Christi in Eucharistia solum est figura. Non sunt nisi duo Sacramenta. Papa est Antichristus. Imaginum cultus idololatria. Mater Dei non invocanda, nec Angeli, nec Sancti : Ulterius, non est Purgatorium. Missa est abominatio, &c.* O secretum virus ! Econtra retinuerunt coram hominibus Sacerdotes , cælibatum , Missam , septem Sacramenta , Ceremonias , Ornamenta Ecclesiastica , Papam , Hierarchiam : denique, omnia illa , quæ ab ipsis populum possent avertere , qui amat illa quæ sentit & ad devotionem excitant ; ut sic absque ullô horrore plebs infici posset. Sed quo modò dicis , ait quispiam schisma timendum ? nonne maxima ipsorum est ; *Non volumus vivere extra Ecclesiam Catholicam ?* Sic est , sed & Pelagius , Macedonius , Euthyches , Donatistæ , & omnium novarum sectarum fundatores semper secundum externam speciem nomen Catholici , & inter Catholicos conversationem ( quantum possibile ) tenuerunt ; ut sic sine impedimentô inter Catholicos cujuscunque sexus æstimationem sui procurare possent ; frequentando tam Regularium quam Sæcularium Communitates , Universitates , Regum ac Principum Curias , &c. ut eo liberius loqui , conversari , prædicare , scribere , consue-

scien-

scientias dirigere valeant, &c. ac sic doctrinas suas inspirare, methodos stabilire, contra adversarios defendere, contra ipsorum sectam concepta destruere, seminare divisiones, & millena praticare media, ut dividantur illi qui corde sincero & charitate non fictâ ipsos prosequuntur: Ratio, quia sic exterius Ecclesiæ adhærentes, quasi amici videntur, & hoc modo novam & noxiam suam paulatim doctrinam introducunt: Optimè scientes, quod, si sese ab Ecclesiâ separarent, nomen ipsorum infame, conversatio suspecta, libri rejecti, doctrina odiosa, ac consequenter sectæ suæ stabilimentum impossibile foret: dumque sciunt, Calvini venenum hâc sæculo mox, ut præsentatur, cognosci ac rejici, operantur secundum Regulam Abbatis S. Cyrani, dicere soliti: *Secretum meum mihi propter metum Iudaorum, id est Catholicorum.*

Videamus ergò nunc quibus coloribus novitates suas tamquam veritates Catholicas divendere satagunt. Hæc est Novatorum methodus; publicare quod doctrina ipsorum sit Augustini; eandemque nec suspectis nec indifferentibus nisi terminis amphibologicis indicare, propositiones obscuras de gratiâ, prædestinatione, libertate, &c. proponere, idque sine explicatione, ut eo avidius novitatis attrahatur curiositas: persuadentes hominibus, quod nil nisi dissolutam Ecclesiæ disciplinam restituere, moresque corruptos emendare intendant; adversarios nomine Pelagianorum & Semipelagianorum nomine decorare, ut sic



ipsorum disputationes Quæstionum Scholasticarum nomine gaudeant, & ideo Molinistas hæreticos vocant invidi : ut autem virus latens sub honesto nomine serpat, doctrinam suam baptizant aliquandò sub hoc nomine : *Disputationes Thomistica contra Iesuitas.*

Placet ulterius videre, quantum hæc dogmatica divisio *Vnitati Polytica*, & communi obfit salutis ? scitote igitur quod utantur in re hoc axioma : *Ad regnandum dividendum.* Ad istum finem Abbas S. Cyrani librum conscripsit de Hierarchiâ, sub nomine *Petri Aurelii* ; ut sic inter Clerum & Religiosus bellum indiceret : moverunt & quæstiones de Missa Parochiali, de confessionibus tempore Paschatis, infirmitatis ; de privilegiis Regularium, de jure conscientias dirigendi, simulque de debito ac autoritate concionandi, catechisandi, &c. ut, durante hac divisione, particulares suas stabilire possent opiniones : ad optatum finem captanda plebis gratia : Ast quomodo ? statuerunt ergo, ut saltem in exteriori mortificationem præ se ferrent, modestè & polyticè inter homines conversando, sicque appareant moribus sancti, doctrinâ excellentes, docti simul & humiles, ut lucrentur populum, qui, sic præventus, de bonitate eorum doctrinæ præsumit. Quod & addendum est ; plebem adducunt ad exteriora pietatis officia, uti est infirmis assistere, captivos visitare : mulierculasque, quæ ad ipsorum mandatum hæc charitatis opera præstant, præclarò *Apostolarum* titulò cohonestant, vulgò *Apostolinnen* : ut autem omnem malam suspensionem de doctrina



nâ suâ averrant , multum ( quasi veri Catholici ) Sanctissimum Altaris Sacramentum honorant : insuper summis invicem laudibus extollunt , ut coram mundo manifestentur nomina eorum , discurrendo in curribus , navibus & consortiis de prædestinatione , de gratiâ , de Sancto Augustino , pro magistris in Israël haberi desiderant , attamen hæc omnia sub simplici narratione ; si autem dicti ratio petatur , mox inclamant : *O Altitudo divitiarum* , &c. gratiam victricem quotidie ejusq; suavitates & delicias proponunt , eamq; certis notis , nec omnibus datis ; cognoscibilem prædicant , nec illas apertè demonstrant , sed solum capacibus , per quæ populum attrahunt , ut desiderio ipsos audiendi flagrent , de negotiô salutis consulendi , ac sic occasionem habent doctrinæ suæ principia spiritibus eorum imprimendi ; hæc populus libenter audiens eo facilius à viâ rectâ deducitur , sanam doctrinam relinquens : nam ut Ambrosius ait lib. 5. Hexameron cap 21. *populus non merita virtutis expendit , nec publicæ utilitatis emolumenta miratur , sed mobilitatis nutat incerto.* Et D.Chrysostomus homilia 2. in Joannem definit populum : *quiddam tumultus perturbationisq; plenum , est stultitiâ , majori ex parte constans atq; compositum , temerè instar fluctuum maris varia & pugnante sententia sæpenumero jactatur.* Quid ergo magis periculosum illi , quam diversis doctrinis agitari ? quod suâ naturâ usque adeò mobile est , non illi multâ est agitatione opus ut moveatur & commoveatur ? donec in se ipso propriis viribus pænitus contractum mi-

serè depereat. Cur domus corruit ? quia parietes alii ab aliis segregantur , & tabulæ claves invicem connexæ dissolvuntur : maceriæ ex disparatis lapidibus compositæ non innititur ædificium , quod firmum ac stabile perseveret , dum verò calce adunati sunt lapides , licet rotundi sint , firmum persistit ædificium ; sic quando cives conjuncti fuerint glutinò charitatis : conjuncti autem erunt , si antiquam retineant. *Unionem dogmaticam* : firmi & stabiles in statu Regiminis , si nullam doctrinæ recipiant mutationem : si verò novæ doctrinæ varietate divisi & sejuncti fuerint , perpetuò in incertum fluctuantes , nullò aut certe non facili negotio unius Reipublicæ legibus coërcebuntur. *Conturbata sunt gentes , & inclinata sunt Regna* inquit Propheta psalmò 45. discordiis enim hominum perturbationes Regnorum & cujuslibet Reipublicæ dimanant ; illudq; cum rebus naturalibus commune habent , ut concordia & unitate conserventur , divisione verò corruant & diluantur.

Ad omnium rerum naturalium generationem omnia elementa convenire oportet & conjungi in unâ concordia & vicissitudine : ex humorum concordia , docet Medicina , corporis oriri valetudinem , eorundemq; discordia innumeros morbos ipsamq; mortem causari. Suavis harmonia non nisi in conformi vocum vel instrumentorum concentu consistit. Eòdem planè modò Status politicus sive Respublica corpus est , in quò , nisi sit concordia humorum , id est *Unitas doctrinalis* , varia & exitialem gignen-



nentur morborum genera, nullis, quantumvis polyticis, medicamentis curanda. Respublica suavis musica est, verum sit in eâ legis Doctores non eundem in docendo teneant concentum, brevi verteretur in luctum: cum in Republicâ aliud iudex nuntiat, aliud præco clamat, vel, ut ait Vincentius Lyrinensis in suo libello; *cum Authores ejusdem opinionis Catholici, confectatore verò hæretici judicantur. Cum absolvuntur Magistri, & condemnantur discipuli, Conscriptores librorum filii Regni erunt, assertores verò gehenna suscipiet.*

Cum in diversum abeant multi tam in morali-  
bus quam polyticis, quis ille futurus Reipublicæ status, quis Ordo? quod si Medici de morbo alicujus ægrotantis continuò disceptarent inter se, an illa disceptatio infirmo morbum auferret? profectò non auferret nec diminueret, sed medicinam differendo augeret. Cum igitur Respublica variis & mortiferis laboret infirmitatibus, disputentq; Medici de morborum genere, & interim, proh dolor! nullum adhibetur remedium, quasi vero Medicorum disputatio ægrotantis Reipublicæ Medicina foret. Quapropter, ô Reges, Principes, Proceres, Statusq; ministri Medicinam propinate, id est Bullas & Decreta Sanctissimi executioni mandate, ut & hæc observent, & sine expressa summi Pastoris authoritate, motu proprio nova non cudant dogmata, eaq; nec inter populum spargant vel propalent; unde & scandala oriuntur, & pusilli seducuntur: In bivio hærent boni plurimi, cui adhæreant nescien-



tes in millenis curis & angustiiis versantur , cum tam diversimodè unumquemq; pro suo libitu moralia explicantem audiunt : mali liberius peccant , cum inter doctos de peccatorum suorum malitia disputari intelligunt ; Nobiles dissolutius vivunt , dum sibi à nonnullis , qui ( ut Ezech. 13. ) *consuunt pulvillos sub omni cubitu manus , & faciunt cervicalia sub capite universa ætatis , ad capiendas animas* , respectu suæ nobilitatis aliquid supra plebem licere dicunt : plebs verò impudentius debacchatur , cum nihil certi in doctrina morali sive polytica esse suspicatur , idq; ratione disputationum ( quæ in solis scholis exercitii causa aliquando fieri deberent ) & ideo Doctores & moderatores suos flocci pendit , cum inter illos de doctrina quæstiones agitari sciat.

Cum Psalmista , Psalmo 132. de pacis *Unitate* & concordia pronunciaffet illud : *Eccè quam bonum & quam jucundum habitare fratres in unum* , duos pacis effectus sub figurâ elegantissime describit , quorum primus est : *sicut unguentum in capite , quod descendit in barbam Aâron , quod descendit in oram vestimenti ejus* : id est Doctores Reipublicæ , ubi pax fuerit , virtute Dei replebuntur , ac suo exemplo , tamquam pretioso unguento totam Rempublicam suavissimè ungunt ; & *sicut res Hermon qui descendit in montem Sion* : hoc est , sicut rores & nives , quæ è Cælis in montes & cacumina ceciderunt , & inde præterlabentes umbrosas valles irrigant , ita Doctorum Reipublicæ doctrina , ac pacificè vivendi exemplum in minores confluit : econtra

tra verò depravati eorum mores ( nam secundum Judicem populi , sic & ministri ejus , &c. *qualis est Rector Civitatis , tales & inhabitantes eam* Eccl. Cap. 10. ) in subditos & inferiores confluunt : cum enim plebs Rectores & Præpositos suos inter se dissentire videt , parum curat concordiam inter suos concives servare : vigilandum igitur nobis omnibus est ; ut quinam sint Novatores cognoscamus , cognoscentes abhorreamus.

Hi sunt , qui ordinariè estimationem & auctoritatem Societatis JESU annihilare intendunt , idq; instinctu diabolico : nam Cyprianus Epist. 58. ad Antonianum ait : *hoc opus semper diaboli , ut Servos Dei mendacio laceret , & opinionibus falsis gloriosum nomen infamet , ut qui conscientia luce clarescunt , alienis clamoribus sordidentur.* Unde hi scientes quod hæreticorum hostes fortissimi sint illi , qui sub vexillo Christi Jesu fideliter decerant ; & nec minus aliorum Religiosorum nomina falsis dicteriis maculare satagunt , utpotè qui sese pro domo Dei , ejusq; Vicario summo Pontifice , instar mirorum novitatibus opponunt , quiq; toties & ore & calamo , imo & sanguine Ecclesiam Sanctam defenderunt , ac hodiedum defendere parati sunt : ac proinde , quia sciunt Religiosos , juxta regulam suam approbatam , corpus suum , ut Spiritui subjiciatur , castigare , in virtutibus & Consiliis Evangelicis excellere , Zelum veræ Fidei habere , hos persequendos suggerit Sathan ; eoq; plus , quod probe noscat , quod hi viri Apostolici , liberi à negotiis secularibus , liberius scientia di-

vina



vina sint occupati , sicq; ad novitates debellandas magis capaces. Cumq; animadvertant , quod Religiosi Societatis Jesu , uti & aliorum Ordinum , corpus constituent quasi immortale , in quo Spiritus Fidei veræ conservatur , utpotè quod semper est subjectum pedibus S. Romanæ Ecclesiæ , dispersumq; sit per totum mundum , & consequenter possint concionari & scribere linguis locisq; diversis ac omni tempore contra novitates à sanctâ Sede non approbatas : insuper , quod sint maximæ partis Christianismi conscientiarum directores , anti- quam ipsorum doctrinam sequentis & consilia ; simulq; constet impossibile , ut omnes ad novas praxes & inauditas methodos perducantur ; quodq; Potestatibus Ecclesiasticis uniant politicas & laicas , ut novitates destruantur : ob has , inquam , rationes stat ipsis firmiter destruere Religiones , auferendo ( quantum ipsis possibile ) nomen bonum & officium sanctum , quod in Ecclesia possident : hinc concluderunt populo persuadere , quod Religiosi non vivant secundum suam Regulam ; quod mores ipsorum corrupti , doctrina perniciosa ; quod non intelligant materiam de prædestinatione & gratia , sintque abusu introductores , Parochos & Parochias vituperent , directionem conscientiarum ac verbi ministerium sibi injustè usurpent , utpotè quæ ad solos Pastores pertinent ; clamantque Religiosos non esse de Hierarchia Ecclesiastica , sed vanos , ambitiosos , vindicativos , &c. & quamvis hæc omnia ad majorem Dei Gloriam animarumq; salutem agere



videantur , cuncta tamen pro proprio interesse faciunt.

Ut autem omnia hæc fortiora & credibilia reddantur , eoq; magis *Vnitas* tam *Dogmatica* quam *Polytica* dividatur , statuunt omnia , quæ dedecus Religiosorum spirant , colligere , collecta in omni occasione ad manus habere ; verum attendite , quam nervosè D. Greg. Nazianzenus de his discurret Sermone de Arianis , dicens : *hæretici captant in nostris , si quid fortè infirmum aut fragile inveniant ; sicut musca vulneribus , ita illi nostris quibusq; erroribus vel verbis fragilibus insident.* Eodem modo Novatores nostri conventicula servant , ubi & musica & carmen difamatorium Religiosorum munia obeunt ; hinc imprimuntur & sparguntur Libelli scommatibus & injuriis pleni , uti est titulo gallico *l'Apocalypse de Meliton* , & alter *le Moine secularisé* , & centum ejusdem hæreticæ farinæ : nil tam cordi habentes , quam populi erga Religiosos auferre venerationem ; unde dum & ipsi obviant Religiosis ne pileum deponant , sed atram bilem foveant , oculos caputq; aliqui avèrtunt : quasi verò *honor non sit in honorante , & non in honorato.*

Probationes forsàn plures quærit veritatis & antiquitatis Amator ? en adsunt alia media , quibus Religiosos prosequi desiderant : auferre igitur volunt doctrinam de meritò per opera supererogatoria ; cum putent Religiosos , vel potius Monachos ( ut per contemptum dicunt ) hoc fundamento subsistere. Sacerdotibus secularibus suspicionem ingerere satagunt , quasi Re-

ligiosi ipsis sint contrarii ; unde persuadere nuntur , ut Sacerdotes , instar Religiosorum , quasi in unum corpus coadunentur , ut sic ( hisce exclusis ) possint soli habere omnem directionem Concionum , Catechismi , missionum , &c. Parochorum jura nimis extollere , Religiosorum privilegia & exemptiones deridere : tandem ecce intentum , zelotypias seminare , divisiones causare , *Vnitatem dogmaticam & politicam* , sibi displicentem , annihilare.

Veruntamen cum homo proponit , non raro Deus aliter disponit : nam toties quoties diabolus bella in Religiones movit , confusus & devictus Christum , in Religiosis triumphantem , agnoscere debuit. Scripta perlegite sanctorum Doctorum tam Angelici quam Seraphici ( qui & contra calumniatores calamos suos acuerunt ) & tales diffamatores , Religionum hostes , pacisque perturbatores sæpius divinitus punitos reperiētis : nec mirum , nam Religiosorum Ordines ( testibus etiam pluribus Pontificibus ) nominantur , & sunt membra Ecclesiæ selecta.

Nec omittenda illa puto , quæ Novatores , adversus Societatem debellantes , intelligere debent. Hæc paucis accipe ( frustra enim schismata tentant ac novitates cudunt , qui sine Summō Pontifice ejusque jussu bellum indicunt ) intelligite ergo hæc & aliquando sapite : præterquam quod Jesus Societatem suam singulariter amet , & Pontifex eandem ( utpotè quæ ipsi singularem præstat obedientiam ) particulariter protegat ; considerate quod prædicta Societas summō cum applausu in doctrina sana & fan-

sancta instruat, quod adolescentes pro novitiis  
 tibus Regularium educet ( nam ex Collegiis  
 Presbyterorum, aut Oratorii vix aliqui claustra  
 petunt ) magnum sane, ut puto, impedimen-  
 tum; quia principia fidei & Catholicae veritatis  
 rudimenta juventuti tam profunde ac firmiter  
 imprimunt, ut eam pervertere difficillimum sit :  
 Adde, quod nomen illustre sibi perperint, tum  
 per libros conscriptos, tum per conciones ab  
 ipsis habitas; quodque famâ non mediocri bene  
 audiant apud omnes, tam ob scholas, direc-  
 tiones, missiones, quam ob religiosa ac spiri-  
 tualia exercitia : ita ut hæc sola abundè suffi-  
 ciant, ut populus Dei in verâ Catholica do-  
 ctrina stabiliatur, &c. Quinam verò, quan-  
 do, ubi, & quomodo hæreticis semper resti-  
 terint, ac etiamnum resistent, historiæ clamant,  
 ac dies iudicii clarius manifestabit : Porro hæc  
 ita moverunt Abbatem S. Cyrani, ut in prædi-  
 ctam Societatem universalis ruinæ fulmen ja-  
 cere attentaverit, sed in vanum : Ast num-  
 quid hostes Societatis triumphabunt, si Cen-  
 sura Lovanientis, de qua ante, à S. Sede  
 ( uti spargunt ) permissa fuerit ? nequaquam :  
 voluntati enim SS. Domini parebunt humillimè  
 in confusionem Novatorum, quorum de facto  
 prehenduntur & informationes subdolæ &  
 delationes in multis suspectæ : unde timendum  
 ne aliquando ex mala informatione licentia que-  
 dam dissimuletur; animadverto autem quod eo  
 ipso quo nomen Societatis legitis, indignemini  
 mihi : non mirum; nam & ipsum SS. Societa-  
 tis nomen vobis est odiosum, attamen scitote,  
 quod



quod nec ideo Jesum ejusque Societatem amare & defendere desistam ( ut opus , quod brevi legetis , confirmabit ) quamvis enim multas Societatis doctrinas & suspectas & laxas immo & aliquas hæreticas affirmatis , nil Novatoribus novi , nam sicut Magister vester sic & vos Discipuli : ille autem & falsas Societati doctrinas affixit , dum ipsasmet docuit : contra auctoritatem S. Sedis ( cui verbo & non re se subinisit ) materiam de gratia proposuit , Baiique prohibitas suscitavit sententias , Societatis Theologos honoravit nomine *Semipelagianorum* , & *Pelagianorum* , &c. at nimis infundate , nimisque festinanter , unde nec mirum quod *Canis festinans cacos quinque pepererit catulos* , ab antiquis Novatores veritatis defensoribus verisque Catholicis dogmata attribuerunt hæretica : Episcopi enim *Arriani* Catholicos *Sabellianos* indigitarunt : ex eo quod Catholici virginitatem matrimonio præferebant , *Iovinianus* hos *Manicheos* appellabat : *Originista* eos brutales , simplices , animales , &c. nominarunt , propter fidem resurrectionis corporum : propter cultum Reliquiarum *Vigilantius* Catholicos idololatrias clamavit. *Nestorius* S. *Cyrillum* tamquam fautorem errorum *Apollinaris* accusavit. *Eutiches* *Flavium* tamquam *Nestorii* sectatorem apud Cæsarem detulit. *Nestoriani* accusarunt omnes Catholicos ( à quibus impugnabantur ) errorum *Eutychetis* : *Manicheismi* notam inurebant Catholicis *Pelagiani* , &c. quid ergo mirum si & modernis Catholicis Theologis nomen & doctrinam falsam attribuant ? audite quid maximus Aquileiensis Episcopus in

Con-

Concil. Lateran. sub Martino I. dixerit; hæc ejus sunt verba : *Quoties & ipsum malignum sensum nudamus jam & factum simulationis eorum detegentes ipsos quoque Patres refutare nituntur* : Adde & Epistol. 1. ad omnes fideles ipsiusmet Martini I. dum de Novatoribus ait. *Illis nonnulla communia existunt cum sanctis Patribus , sed quantum distat ortus ab Occidente , tantum distant hæretici à viris à Deo inspiratis*. Augustini sese , alios Pelagii Discipulos nominant : sed tantum Augustini doctrina ab ipsorum differt quantum lux à tenebris : quare Rex Catholicus , qui Jansenio ( antequam errores hi in Hispania erant noti ) Mitram Ipreensem benevolè concesserat, eandem uti & omnes à sequacibus juste abstulit : dum anno 1647. 21. Decembris expresse prohibuit , ne quis novi hujus Apostoli Discipulus ad ullam admitti possit Prælaturam ( uti & reipsa in Henrico , &c. Mechliniæ patuit ) nisi prius abjurata nova hac hæresi , cujus & abjuratæ formulam præscripsit S. D. N. Alexander VII. in Constit. quæ incipit. *Regiminis* , &c. Romæ anno 1664. 15. Kal. Martii Pontif. anno 10. cui voluntati tam Apostolicæ quam Regiæ utinam omnes obedirent promptissimè , tunc pax : sed revertamur ad propositum.

Cum curiosus ergo sis & à me petas , quibus mediis ad hunc finem pervenire intenderint aliqui ? quomodo societas oppugnata , ut sic *Vnitas dogmatica* & Catholica divideretur ? attende , & breviter respondebo : Imprimis scripserunt contra ejus classes , docendi methodum , & Professores , uti & hodiedum : deinde , ut

can;



eandem odiosam redderent , mercaturam exercere falso divulgarent : utq; corda hominum ab hâc magis averterent , materiam invidiæ contra eandem inter alios Religiosos Ordines sparserunt : modo artificioso ac simul diabolico Societatis libros , Prædicatores , Theologos , aliosq; Authores , conversationem eorum & Regimen turpiter diffamarunt : At his omnibus maturè examinatis , inciderunt accusatores in foveam quam fecerunt , cum confusione publicâ , & quidem tali , ut recurrere debuerint ad dogmata polytica famosi Ministri *Du Moulin* , cujus spiritus dives in inventionibus & fictionibus , quibus suis sectatoribus corruptam & perniciosam ( ut agebat ) Ecclesiæ Romanæ doctrinam clare se proponere jactabat. Eodem pernicioso & venenoso calamo scripserunt contra Theologiam moralem Jesuitarum ; & quamvis Viri docti & cordati malam eorum fidem ac impudentiam deprehenderint , in locis tamen , ubi domicilium non habent , moralis ipsorum doctrina ut laxitate plena traducitur , &c. hæc interim pati debuerunt & patiuntur veri & zelosi Ecclesiæ Filii , in hoc solo invicem consolantes , quod *Beati qui persecutionem patiuntur propter Iustitiam , quoniam ipsorum est Regnum Calorum.*

His lectis judica , quis *Vnitatem Dogmaticam & Polyticam* , defendere , quis evertere studeat. Qui Antiquitatem Catholicam protegent , homines reddunt quietos , qui verò novitates introducunt turbant : Hinc inter Moniales & Beginas schismata causata ; inter Cives dissidia

ex.



excitata; in Capitulis pro antiqua possessione lites oboræ; tot scandala in Templis perpetrata; tot accensæ invidiæ, tot calumniatorum ora aperta; tot collectæ rancoris materiæ; tot homines ad desperationem acti, tot horribiles factæ abominationes; ut plus sit quam tempus, ut antiquitas defendatur, & novitas expulsetur; ut & Catholici in sancta & antiqua Sacramentorum praxi maneant quieti; verum debitumque B. V. MARIÆ cultum retineant, Parochi sua jurâ, Religiosi sua privilegia possideant. Quæ omnia infallibiliter fient, si sese omnes unanimiter & fideliter, corde sincero, & obedientia non fictâ, definitionibus, Constitutionibus, Decretis & Bullis Sanctissimi Domini nostri Summi ac Romani Pontificis subjiciant; infallibiliter credentes & executioni mandantes, quæ ipse, tamquam Papa, Christi Vicarius, Ecclesiæ caput visibile, Summus in terris Pastor & Rector, infallibiliter proponit; Ejus voluntate contenti in obsequium fidei intellectum nostrum captivantes, tunc nihil de schismate timendum. Quod ut desideratum sortiatur effectum, ac Obedientia erga Summum Pontificem realiter adimpleatur, rogantur humillimè omnes Reges & Principes, ut omnes novitates prohibeant, nilque in sua Regna vel ditiones, nisi à Summo Pastore approbatum, introduci permittant.

Monitum quoddam ad Augustum reperiō (ut Mæcen. apud Dion. Cassium lib. 52.) scilicet : *Divinum illud Numen omni modo, omni tempore ipse cole, juxta leges patrias; & alii ut colant effice: Eos verò, qui in divinis aliquid innovant,*

odio habet & coërce . . . . quia nova quadam Numina  
hi tales introducentes , multos impellunt ad mutatio-  
nem rerum , unde conjurationes , seditiones , conci-  
liabula existunt ; Res profectò minime conducibiles  
Principatui. Quòd confirmans Lactantius i. In-  
stit. cap. 20. ait. Religio & veneratio nulla nisi  
unius Dei tenenda est. Unius Dei , & trini in Per-  
sonis , Creatoris , Salvatoris , Remuneratoris ,  
Judicis tenenda fides ; una scilicet Catholica ,  
Apostolica , Romana ; quidquid illa continet ,  
aut ut credendum proponit amplectimur , uti  
& Ritus & Ceremonias cæteraque omnia , quæ  
à Matre nostrâ Romanâ Catholicâ recipimus  
Ecclesiâ , ut certa tenemus , nec aliis spiritibus  
credimus , ne corde leves , vel damnationi  
inveniamur obnoxii. Puni igitur , ait Lipsius  
lib. 4. cap. 2. Polyticorum , si quis turbat. Serio  
feriò hoc imbebe ; nihil esse ( teste Lactantio  
lib. 5. Instit. cap. 2. ) in rebus humanis Religione  
præstantius , eamque summâ vi oportere defendi : &  
pergit Polyticus Lipsius , Civilis Doctrinæ  
lib. 4. cap. 3. dicens : Ergò firmiter nostra sen-  
tentia est unam Religionem in unò Regno servari.  
Queri tamen dno possunt : semperne puniendi qui  
dissentiunt , & an omnes ? quâ de re ut disseram ,  
non curiositas me impellit , sed publica utilitas , &  
præsens hic Europa Status , quem nego me sine lachry-  
mis intueri. O melior mundi pars ! quas dissidio-  
rum faces Religio tibi accendit ! colliduntur inter se  
Christiana Reipublicæ capita , & milleni aliquot ho-  
mines perierunt & pereunt per speciem pietatis.  
Quis hic silebit ? non ego : Et quamvis cum Pla-  
tone sciam calumniis hæc obnoxia in vulgus , nec quid-  
quam tam probe aut providè hic dici , quod non vel-



*licare malignitas possit : tamen subibo discrimen , & pro virili aquam infundam in sacrum hunc ignem : hoc excusatus , quod consilia non decreta adfero , nec assero aliquid , sed pono : tu qui legis , scito à piâ puraq; mente hæc esse : & si ipsa aliter , subjici me iis quorum propriè cognitio & censura.*

*Vt rem intelligas , duo eorum genera facio qui in Religione peccant : qui publicè , & qui privatim. Publicè peccare dico ; Qui & ipsi malè de Deo receptisq; sacris sentiunt , & alios ad sentiendum per turbas impellunt. Privatim , qui pariter male sentiunt , sed sibi. De primis primò queritur , an talibus debeat esse impune ? nego. Puniantur à te , ne tu pro illis puniaris. Hæc sunt verba Cypriani , de util. pœnit. Et pergit Lipsius , dicens : Maximè si turbant , & addit Augustini verba : Melius enim est , ut pereat unus , quam ut pereat Vnitas : Nam non hic clementiæ locus. Vre , secâ (ait Cicero Philip. IIX.) ut membrorum potius aliquod , quam totum corpus intereat ; quia , quod in Religionem Divinam committitur , in omnium fertur iniuriâ : sic habet Justinus lib. 4. Cod. de Hæreticis.*

*Quare summo jure Senatus Regius theses scandalosas & tumultum causantes prohibet ( uti prohibuit. . . . . ) & è Cathedris continuas punctiones & scommata in Religiosos effutientes impedire tenetur , cum videat hæc omnia à Religiosis animo pacifico excipi , animas suas in vera patientia possidentibus.*

*Interim , quamvis contrâ communes hostes pro salute communi una communis debeat vigilantia , sicut Leo Papa refert locò antea citatò ; certum equidem est , quod ad Episcopale munus maximè pertineat : tali enim dignitate ful-*



gentes , tali etiam curâ onerantur , utpote qui in magno Iudicii die pro animabus sibi commissis reddituri sunt rationem : Unde & omnes oves æquali amore complecti debent , eademque charitate reducere omnes ; ut sit communis Pater omnium , omnesque æqualiter de paterna ejus charitate accipiant , ac eadem auctoritate protegantur ; & sic innocens non despiciatur , minus opprimatur , ac nocens injustè defendatur : Nam , *quid aliud interpretatur Episcopus* ( hæc verba S. Ambrosius lib. de dignitate Sacerdotali cap. 16. ) *nisi Superinspector , maximè cum solio in Ecclesia editiore resideat , & ita cunctos respiciat , ut & cunctorum oculi in ipsum respiciant ?* O verba verè aurea ! nam ( teste S. Augustino lib. 19. de Civitate Dei cap. 19. ) *nomen Episcopatus est operis , non honoris.* Verum quidem , ut Ambrosius lib. cit. cap. 3. *In hoc saculo nihil sublimius Episcopis reperiri , ut cum dignitatem Episcopatus Episcoporum oculis demonstramus , & digne noscimus quid sumus professione , actione potius , quam nomine demonstramus ; ut nomen congruat actioni , actio respondeat nomini ; ne sit nomen inane , & crimen immane ; ne sit honor sublimis , & vita deformis ; ne sit deifica professio , & illicita actio ; ne sit Religiosus amictus , & irreligiosus proventus.* Et cum Episcopi ( ut Prosper ait de vita contemplativa lib. 2. ) sint *fideles populi Duces , veritatis Assessores , prava doctrina hostes* , etiam impedire tenentur , ne lupo oves devoret ; ne introducantur novitates , quarum populus avidus sentit aliquando insipidum & amarum æternæ damnationis fructum : legite lib. de 12. abusibus cap. 10. inter opera Augustini , ubi hæc

hæc invenies : Speculatorem te dedi domui Israël , si autem videris gladium venientem , & tu non annuntiaveris , ut revertatur impius à viâ suâ , ipse quidem in iniquitate sua morietur , sanguinem verò ejus de manu tua requiram. Et certè tanta est Episcopalis dignitas , ut cura & autoritate suâ linguas Novatorum facillimè refrænare valeant , ac sic impedire ne novum aliquod dogma in fidelium cordibus radicetur : cum enim Novator aliquis aliam quam eorum doctrinam prædicare præsumit ( intelligo doctrinam quæ de sæculo in sæculum , de Episcopo ad Episcopum continuâ successionem ad nos pervenit ) frænum tali injicere possunt , silentiumq; imponere tenentur , ne , falsam peccaminosâ misericordia doctrinam dissimulantes , Dei offensam & judicium incurrant. Sic docet Leo I. Epist. 3. ad Julianum Aquiliensem Episcopum , ubi sic habet : *Non dubitet dilectio tua nos si ( ut quod arbitramur ) neglecta fuerint , qua pro custodia Canonum , & pro fidei integritate decernimus , vehementius commonendos : quia inferiorum ordinum culpa , ad nullos magis referenda sunt , quam ad desides negligentesque Rectores , qui multum sæpè nutriunt pestilentiam , dum necessariam dissimulant adhibere medicinam.*

Sane reatu majore delinquit ( ut Symmachus I. in Concil. Rom. 6. quod celebravit ) qui potiore honore perfruitur , & graviora facit vitia peccaminum sublimitas dignitatum : ideò tacere non debemus , sed ea quæ necessaria fore agnoverimus , viriliter corrigere & emendare satagamus , ut ea quæ nociva sunt extirpare , prout Dominus dederit satagamus. Optandum igitur , ut impudentum ora claudantur , dominodò verè talia sunt : non

enim sufficit, quod, etiam falso, quidam ab adversariis ad Episcopos delati & accusati, statim, inaudita parte ac scandalo communi, ab Officio concionandi suspendantur: hoc enim agendi modo nociva non solum non extirpantur, sed magis falsorum istorum calumniatorum invidia, tali fulta authoritate, succreuit, & veritas sub modio latet, & innocentia opprimitur.

Ut autem Novatores & perturbatores coercerentur, ac hæretici extirpentur, sicq; non permittatur ut habeant sua conventicula, ubi Verbum Dei depravent & veritatis præcones derideant, admonet Leo I. Epist. ad Episcopum Italiæ: *Aliter enim, ait, nobis commissos regere non possumus, nisi eos, qui sunt perditores & perdit, zelo fidei Dominica prosequamur, & à suis mentibus, ne pestis hæc latius divulgetur, severitate quâ possumus abscindamus: ut enim habebit à Deo ingens remunerationis præmium, qui diligentius, quod ad salutem commissæ sibi plebis proficiat, fuerit executus; ita ante tribunal Domini de reatu negligentia se non poterit excusare, quicumque plebem suam, contra sacrilega persuasionis authores, noluerit custodire.*

Patres Concilii Lateranensis Generalis sub Innocentio III. Cap. 3. postquam præscripserunt qualiter Archiepiscopus aut Episcopus erroribus debeat invigilare, addunt hæc verba: *Si quis enim Episcopus super expurgando de suâ Diocesi hæretica pravitatis fermento negligens fuerit vel remissus, cum id certis indiciis apparuerit, & ab Episcopali officio deponatur, & in locum ipsius alter substituatur idoneus, qui velit & possit hæreticam confundere pravitatem.* Hoc idem decretum adeo rationi consonum iudicatum fuit, ut Martinus V. in fine Concilii



Constantiensis, idem renovaverit contra Wiclef, Ioannem Hus, & Hieronymum Pragensem.

Cumq; omnis Novitas *Vnitatem* tam *dogmaticam* quam *polyticam* lædat, sicq; animos à vera charitate dividat ac Regna disjungat, oportet ut Serenissimi Principes & Christianitatis Monarchæ, quibus à Deo datum est populum regere, potentias suas spirituali authoritati adjungant, ut sic Decreta Apostolica maiorem vigorem & robur accipiant; pestisq; propulsetur exitialis animabus & Regnis: hæc enim (nisi tempestivè obstaculum ponatur) rependo Status vestros inficiet, & infectum divisionis ignem, postquam illum circa Altaria & sacra Mysteria accenderit, ad Thronos vestros asportabit. Nam si Christi tunica, multo prætiosior Regum Purpurâ, per novitatis schismata dividatur, nosne putabimus, quod Purpuras non dividant Regales? nolite dubitare: talis enim est Unio inter Ecclesiam & Status Catholicos, quod unum membrum absq; alio lædi non possit. Legamus nunc Epistolam, quam Cælestinus Papa scripsit ad Theodosium Imperatorem, ratione quorundam novatorum, teste Baronio ad annum 431. Sufficiat licet (sunt verba Pontificis) quod sollicitudo vestra Clementia circa Fidei Catholica defensionem, cui, pro Christi Dei nostri amore, qui vestri Imperii Rector est, adesse modis omnibus festinatis, integram immaculatamq; eam, pravorum dogmatum damnato errore, servatis; in hoc semper munimen vestri constituentes Imperii; scientes Regnum vestrum sanctæ Religionis observantiâ communitum firmitus duraturum. Pietatem vestram sub Divini obsecrantes obtestatione iudicii, ne quid tur-

*hida Novitati licere vestra mansuetudo permittat, neve facultas aliqua ijs, qui divina Majestatis Potentiam in humana disputationis rationem arctare contendunt, quò perturbetur pax Ecclesiastica, tribuatur: major vobis fidei causa debet esse quam Regni; ampliusq; pro pace Ecclesiarum Clementia vestra debet esse sollicita, quam pro omnium securitate Terrarum: subsequuntur enim omnia prospera, si primitus quæ Deo chariora sunt servantur. Abraham fide floruit, omnemq; orbem gloriâ suâ prosperitatis implevit. Moyses populi liberator, Zelum Domini contra eos, si quos à Dei cultu recessisse probarat, armavit. David Regem sua præcepta servantem in Regno, ut ille inimicos suos subderet, Dominus custodivit. His rogo exemplorum vallati præsidio, fide, observatione, virtute, universalis Ecclesiæ in Deum nostrum piissimum cultum, ne sibi aliquid dissensij vendicet, custodite: pro vestri enim Imperij salute geritur, quidquid pro quiete Ecclesiæ, vel sanctæ Religionis reverentiâ laboratur.*

Hæc quæ Cælestinus Theodosio repræsentavit, illa, quæ sub ipso facta sunt, confirmant: nam hic Princeps, qui, quasi Dei armiger, divinum cultum contra hostes defendit, qui tot contra novitates edidit decreta, qui Regnum taliter pro Religione moderabatur, ut super omnes fuerit exaltatus, quiq; manu Dei inauditam de Persis victoriam reportavit: Cui Cælum contra hostes barbaros & tonitru & fulmine ad victoriam cadente, suorumq; sanguini pepercit: qui & tempestates ventosq; turbidos precibus sedavit: paucis; cujus palatium Cæsareum Religioforum Claustrum, &c. Tandem adeo maledictus fuit, ut aurem præbens inferni serpentis halitui, auscultans, dico, & fovens Nestorium hæc



hæreticum , persequeretur Episcopus : & ecce ! in instanti vindicta Dei super Imperatorem & Imperium , &c. Ex quibus constat clarissimè quod dum Imperatores & Reges Ecclesiam Dei defendunt , defendat & ipsorum Regna Altissimus ; è contrà verò , dum Novatoribus aut hæreticis favere incipiunt , omni Cæli favore & gratia destituantur , ac divina indignatio , Regna dissipans , iisdem superveniat. Testentur hoc plurima coronata Capita , uti *Heraclius* , *Iustinianus* , *Constantius* , *Valentius* , *Mauritius* , *Leo* , *Gratianus* , ac Cæsares omnes : Idemque patuit inter Christianissimos Reges , Regesque Catholicos : Illustrissimæ namque piissimæque Austriae dum stirpi benedictio data & danda ob strenuam Fidei defensionem : quæ ut magis magisque defendatur , sicque omni benedictione cœlesti Catholica Monarchia repleatur , hæc scripsi stilo simplici , omnibus Veritatis Amatoribus pergrata fore sperans ; scripsi enim Veritatis & Unitatis amore , & hæc , si malus aut invidus contemnat , nil mihi mali ; nam cum ulterior mihi desit potestas , ut *Unitatem* tam *dogmaticam* quam *Polyticam* defendam , sufficiat voluntas. Tandem finiens cum Lypsiø polyt. lib. 4. c. 3. dico : Et tu qui legis scito à piâ puraque mente hæc esse : & si ipsa aliter , subjici à me iis , quorum proprie hæc cognitio & Censura.

Christianorum ergo Principum pedibus advolvor , & ante Thronos Catholicorum Monarcharum , præsertim CAROLI II. ( cui Deus in omnibus benedicat ) Regis nostri clementissimi prosternor , ac supplicam nostram non minus confidenter quam humiliter propono , verbis  
Leonis



Leonis Papæ primi Epist. 75. ad Leonem Augustum, quibus ab ipso petit Pontifex, quatenus se Novitatibus opponeret. Clementissime Princeps, Ecclesiæ defensor singularis. Cum sancto spiritualiq; studio universam pacem Ecclesiæ munias, nihilq; sit convenientius Fidei defendenda, quam his, quæ per omnia, instruente Spiritu sancto irreprehensibiliter definita sunt, inharere; ipsi quomodo videbimur statuta velle convellere, & authoritates, quas Ecclesia universalis amplexa est, ad arbitrium hæretica petitionis infringere; atque ita nullum corrigendis Ecclesiis modum ponere, sed data licentia debellandi, dilatare magis quam scire certamina. Quid probabilius, quid religiosius poterit pietas vestra discernere, quam ut quæ non tam humanis quam divinis sunt statuta decretis, nullus ultra sinatur impetere, ne verè digni sint Dei munus amittere, qui de veritate ipsius ausi fuerint dubitare? Cum ergo Universalis Ecclesia per illius principalis petra ædificationem facta sit petra, & primus Apostolorum beatissimus Petrus voce Domini audierit: Tu es Petrus, & super hanc petram ædificabo Ecclesiam meam; quis est nisi Antichristus aut diabolus, qui pulsare audeat inexpugnabilem veritatem, qui in malitia sua inconvertibilis perseverans, per vasa ira & suæ apta fallacia, falsò diligentia nomine, dum veritatem se mentitur inquirere, mendacia desiderat seminare? Cum enim Clementiam tuam Dominus tanta Sacramenti sui illuminatione ditaverit, debes incunctanter advertere Regiam potestatem tibi, non solum ad mundi Regimen, sed maximè ad Ecclesiæ præsidium esse collatam; ut ausus nefarios comprimendo, & quæ bene sunt statuta defendas, & veram pacem his, quæ sunt turbata, restituas. A M E N.

*Libellus supplex contra Novitates representatus  
Serenissimo Principi IOANNI AVSTRIACO,  
cujus Copiam authenticam , si ante mihi missa  
fuiſſet , in frontispicio hujus scripti impressis-  
sem : sed jam tantummodo ad manus meas per-  
venit , &c.*

SERENISSIME PRINCEPS ,

**A**Mplum & Illustre Principum Regum-  
que munus est. Quid enim inter homi-  
nes majus , quam unum præſſe pluribus ,  
leges & jussa ponere , maria , terram ,  
pacem , bella moderari ? Divinitas quædam  
( ait Lipsius ) videtur hæc dignitas : & est  
profecto , si salutariter atque ex usu publico  
adminiſtretur ; sed hoc quam arduum ſit , tum  
ratio nos docet , tum exempla. Illam si in-  
ſpicimus ; quantæ molis ab uno capite tot  
capita coërceri , & univerſam illam multi-  
tudinem , inquietam , discordem , turbidam ,  
leviter redigi ſub commune quoddam obe-  
dientiæ jugum ? ſi hæc ; quam pauci ab  
omni ævo reperti , qui laudabiliter hoc mu-  
nere functi & deſuncti ? ut veriſſimè dixe-  
rim difficile eſſe homini in hominem im-  
perium , difficile multitudinem ſub jugum  
redactam in pace & obedientia conſervare ,  
ſi quis Novitatibus turbet quietam. Hinc eſt  
quod humillè ad Celsitudinem Veſtram Re-  
giam



giam Belgium recurrit, dum sese miratur & Novitatibus, tam quoad praxim Sacramentorum, quam quoad cultum B. V. MARIAE, Sanctorum eorumque Imaginum, supplicationum, &c. irrepentibus, turbatum; dum obstupescit quod graves sint controversiæ & contentiones pertinentes ad doctrinam Theologicam ( uti representarunt quidam Theologi in libello suo supplici ad Suam Majestatem 10. Septemb. anno 1676. ) v. g. de gratia, Christi morte, lib. arbitrio, dilatione absolutionis in pluribus illis casibus, quibus differri volunt tot recentium libellorum novæque praxis authores, &c. quibus inquietatur; speraverat quod illi zelosi Romæ tantum effecissent, ut per definitionem aut constitutionem Apostolicam veritas innotuisset, at è contrario demonstratæ & condemnatæ 65. Propositiones ( quæ minime umquam Belgium turbaverant, ubi & plurimæ hæctenus inauditæ ) quæque Cura illorum Flandrice impressæ & è Cathedris ( tamquam si fuissent Religiosorum Belgicorum dogmata ) acrimonia non vulgari publicatæ maximam pepererunt turbationem. Recurrit Belgium quatenus paci publicæ & quieti, Summi Romani Pontificis infallibili authoritati, veræ fidei sacrorumque rituum antiquitati Regia authoritate consulatur. Inhibendo ne quid novi permit-



tatur inconsulta sancta Sede : unde timen-  
tes Domini de Magistratu Bruxellensi anno  
1674. ne oriretur confusio in Civitate , ex  
eo quod Archiëpiscopus Mechliniensis vo-  
luerit inhibere ( uti & reipsa inhibuit ) ne  
Processiones , quæ ab omni antiquitate hic  
factæ sunt, comitantibus Imaginibus SS. Sa-  
cramentum ) amplius more antiquo & lau-  
dato fierent , recurrerunt ad Excellentissi-  
mum Comitem de Monterey , &c. tunc  
Belgii Governatorem per libellum suppli-  
cem, in quo inter alia : *Exhibent humillimè illi*  
*de Magistratu hujus Civitatis Bruxellensis , quod*  
*ab omni antiquitate , sit hic consuetudo , ut fiat*  
*Processio generalis Festo die S. Michaelis , &c.*  
*in qua portatur Venerabile Sacramentum simul*  
*cum Imagine S. Michaëlis , &c. & cum à pau-*  
*co tempore Illustrissimus Archiëpiscopus Mechli-*  
*niensis miserit Clero decretum , ne permittat ,*  
*quod portetur Venerabile Sacramentum si quæ-*  
*cumque Imago alicujus Sancti Processionem co-*  
*mitetur. Nos reperimus quod causet difficulta-*  
*tem , &c.... & cum non possimus effugere*  
*( nisi portetur Imago prædicti Patroni simul cum*  
*Venerabili ) quin simus expositi maximæ populi*  
*murmurationi immo & scandalo , quod & præ-*  
*venire tenemur , quantum possibile , & cui ali-*  
*quando in instanti occurrere non valemus , illi de*  
*Magistratu necessarium judicarunt exhibere hac*  
*inconvenientia Sua Excellentie , rogantes humil-*  
*limè*

*limè quatenus ordinare velit Clero S. Gudula,*  
*ut permittat , quatenus simul cum Venerabili,*  
*Imago S. Patroni Michaëlis Processionem comi-*  
*tetur...* Quibus malis ut occurrat, antiqui-  
 tatem laudabilem ut defendat, ac novita-  
 tem impediatur : Excell. D. Comes de Mon-  
 terey.... scripsit & mandavit Capitulo  
 S. Gudulæ, quod (non obstante decreto de  
 die 29. Aug. ultimi, ac in contrarium exi-  
 stentibus rationibus quibuscum, quibus vi-  
 derentur aliqui ad Novitatem seducti) tene-  
 rent Processionem moribus antiquis : sic  
 habent ejusdem litteræ datæ Bruxellis 4.  
 Oct. 1674. Paraph. Pa. Vt. Sign. El Con-  
 de de Monterey, & inferius de Gottignies :  
 pluraque alia incommoda jam nunc ex hac  
 & simili novitate exurguntia luget Belgium,  
 quod consolata est Regina Mater tunc Re-  
 gens per litteras de data 30. Junii 1675. in-  
 hibens omnes Novitates, hæcque pondera-  
 vit Regium & privatum Belgii Conci-  
 lium, dum ratione inhibitionis antiquæ  
 Processionis Alostanæ, scandala exurgere,  
 pacem publicam perturbari animadvertens,  
 Illmo. D. Archiëpiscopo hæc sequentia inti-  
 mavit. Nomine Regio volumus, quod Clerus  
 & populus prædictæ Civitatis relinquantur in an-  
 tiqua possessione instituendi Processionem modo  
 supradictæ ( scilicet comitante Imagine Bea-  
 tiff. Virg. Mariæ Venerabile Sacramen-  
 tum)



tum ) sine quod respectu hujus introducatur vel minima novitas : cum Regina Mater nostra intimaverit per litteras suas de data 23. Julii ultimi Gubernatori Patriæ , quod talis sua sit voluntas , quodq; sibi displiceat , quod volueris aliquid novi introducere , non volens quod radicem sumat , cui adherere consultum reperimus pro præsentì , donec Decreto generali S. Sedes post fundatam deliberationem aliter potuerit ordinasse : Bruxellis 4. Oct. 1675. Paraph. de Pa. Vt. & signat: Routart. His omnibus non obstantibus ( Serenissime Princeps ) Novitates accrescunt. Unde & Belgii Religiosos aliosque cordatos , qui S. Sedis ac Monarchæ nostri mandato adherere cupiunt , persequuntur. Bullas & Decreta Pontificum , in quantum sibi non contraria recipiunt , propria authoritate Ecclesiam Belgicam reformare , se quidam dicunt , ex quo omnis Romana hic decideret cum tempore authoritas , nisi hanc Regia defendat : hæc & plura oriuntur à Jansenismo , qui incipit & aures erigere & schisma causare , quod ut impediatur , adjunctum scriptum collegi , optans ex animo , quatenus mandatum Clementissimi Regis nostri Philippi IV. ( piæ memoriæ ) de data 21. Decemb. anni 1647. quo prohibuit ne quis , hujus novi Apostoli Discipulus ad Prælaturam eligi aut promoveri possit , infallibiliter observetur : simulque



que decretum SS. D. N. Alexandri VII. datum anno 1664. 15. kal. Martii, ubi & formula abjurationis habetur. Unde pro pace publica rogatur Serenissima sua Celsitudo, quatenus manum admovere dignetur ne Novitates Belgium turbare pergant: notum Cel. V. Belgium Belgarumq; pro Fide, B. V. MARIA, Summo Pontifice, Regia Sua Majestate zelus sincerus, ex quo & gratias agit prædictæ Suæ Majestati, quod designaverit pro Sede Episcopali Antverpiensium Rmum & Illmum D. Ioan. Ferdinandum van Beugem, Virum pacificum & doctum, Patrem communem (ut ex nunc nobis virtutes ejus affirmant) verum animarum nostrarum Episcopum, B. V. Mariæ devotissimum, Summo Pontifici Regique fidelissimum, antiquitatis Patronum, pauperum Patrem, &c. Sperans quod sese instar muri hæreticis (qui nos circumstant) & Novatoribus sese opponet; adolvitur ergo pedibus vestris Belgium, humillimè supplicans, quatenus Novitatibus finis imponatur, & S. Sedis autoritas, B. V. Mariæ cultus, &c. defendatur, & obedientia stabilatur erga Monarcham nostrum CAROLUM II. (cui Deus & toti Domui Austriacæ benedicere dignetur) sicque Pax restituatur, quod faciendo, &c.

Vidit & Approbavit F. A. L. C.

Act. 12. Julij 1679.

